

宫教集

崔敦礼

文硕阁

wenshuoge.com

目录

关于我们	3
提要	5
卷一	6
卷二	11
卷三	19
卷四	25
卷五	31
卷六	37
卷七	43
卷八	49
卷九	57
卷十	62
卷十一	66
卷十二	70

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部四

提要

宫教集十二卷 别集类三【宋】

臣等谨案宫教集十二卷宋崔敦礼撰敦礼有刍言已着录焦竑国史经籍志载崔敦礼集二十卷其本久佚他家书目亦罕着於录故厉鹗宋诗纪事不及敦礼之名惟永乐大典载有敦礼宫教集其诗文篇帙尚富大抵格律平正词气畅达虽不能领新标异而周规折矩尺寸不踰前辈典型兹犹未坠未可等诸自郅无讥谨采掇编次厘为十有二卷第五卷内有进重删定吕祖谦所编文监劄子一篇称删去增添别写进呈云云考李心传朝野杂记谓吕祖谦文监既成近臣密啓其失当乃命直院崔大雅更定增损去留凡数十篇大雅者其弟敦诗字也朱子语类尝论祖谦编录文监事亦有崔敦诗删定奏议之语是此劄当出敦诗不出敦礼似乎永乐大典偶尔误题然或敦诗刊定进呈敦礼代为草奏亦未可定今既别无显证姑仍其旧录之而附着其舛互如右乾隆四十六年九月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

卷一

钦定四库全书

宫教集卷一 宋 崔敦礼 撰赋五首

石湖赋

崔子问於石湖先生曰富贵人所愿闲寂不可居位通显者有洋洋之志处幽旷者怀戚戚之悲此人之常情也先生芥鍾鼎而不盼履轩冕而若遗居无墙宇之饰而丘壑以为乐家无珠玉之玩而泉石以为资不已迂乎先生莞尔而笑曰子安知予之真乐哉寓形宇宙间身世同浮萍吾常委心任去留奚肯逐物而营营时乎见用则进而上紫微之掖一朝遇坎则退而归石湖之耕方其余之在紫微未尝忘江湖之梦及其余之耕石湖也益自觉公侯之轻盖山林斯予之至乐而簪绂不能以撓情者也子尝览吾石湖之胜矣其地有残堞故垒断岸长云弥迤延连繚曲幽深者越王之所城也东临具区观沧波之杳渺怒涛之轩轰风帆浪楫出灭烟云者夷之所经也西傍越溪见吴王之台想夫千军万马衔枚潜渡黄金白璧之殿化而为荒莱南连横山北睇亚字城楼观相望翼乎峥嵘其地势奇古如此自越迨今千五百岁霜露之所蒙翳狐狸之所窜处至於登临之要则不得而择其所我乃披天奥发地藏平夷土涂诛薙芜荒抉万象之偃蹇洗千古之凄凉筑农圃湖山之观耸碧城崑阔之丘岫幌纳千峯之秀云庄开万壑之幽夜月兮嬉渔春风兮芳洲渺烟波兮鸥鹭适忘机之乐度雪桥兮龟鱼听拄杖之游【皆园中名】至於水静鹄立林幽鹤鸣漾湖光於几席占山影於台亭花粲粲以昌披木欣欣其敷荣菡萏兮十里琅玕兮满城其他幽芳奇观间见层出又不可殚举而悉名於是或命篮舆或漾轻舟或舒啸以登皋或赋诗而临流或掘云於嶧之顶或采月於澄泓之洲若乃浩荡连空月华正中鉴秋毫於浮玉倒寒影於垂虹鼓棹踏松江之浪扣舷吟笠泽之风访蓴鲈於渔父诘龙橘於江童此天下之至乐也其何得以加之崔子闻之曰先生乐哉矛头渐米剑头之炊不如枕流漱石脱富贵之危机翻手作云覆手作雨不如遗名絶俗与烟月为侣先生乐哉虽然趋朝市者患於既倦而不知归入山林者失於固藏而不肯仕先生石湖之乐诚乐矣当如江上之清风山中之明月欣然接之可以寓意而不可以留意若曰抱其道而不施怀其材而不用必欲就闲逸乐幽隐为将老之计此余所未取也於是作石湖招隐之歌歌曰清且泚石湖之水高崭岩石湖之山湖之幽可钓可游湖之侧宜稼宜穡有美一人兮乐无涯朝出游兮莫来归曳杖兮吴台维舟兮越溪念夫君兮淹留葺兰芷兮芳洲长松卧壑兮风飏飏深山紫玉兮光彩浮万牛回首兮挽山丘五城一覩兮礼必优宜规明堂兮备前旒去来去来兮石湖不可以久留

种松赋

崔子居山间种松於东冈之上地旷而平培土而密筑其殖之也若穉秧之插其忧之也若婴儿之育戢戢乎黄茅之底眇眇乎苍岑之麓有客过而叹曰勤矣子之种松也吾闻天施地生雨露则一草木之长於松为畜经年仅益於毫末再岁尚湮於蓬棘盖屡补而莫齐或百枚而

得一形如偃盖兮待千岁之久化为茯苓兮由百岁之积今子施种艺之功竭壅培之力以附土之寸根待干云於异日不其迂哉余曰噫嘻客之言过矣夫植之微者本必固长之吝者未必荣木有亟茂而先颠物有速蕃而骤零栽桃李者早华种榆柳者易阴柞薪析而愈盛樗□剪而还生然皆摧折於飞雪之後憔悴於严霜之辰随寒暑以同化与粪壤以俱沦乃若松之茂也干排风雷根裂崖石鳞蹙百丈髯苍千尺其柯参天则鸾凤栖其巅其肪入地则龙蛇伏其窟凜高节兮四时不能易其操建大厦兮万牛不得轻其力兹岂衆木之凡姿与夫百草之弱质者所能比哉呜呼在物固然於人亦尔殖德者不贵其苟种学者匪图其易濫礼义之华实毓性情之根柢养其小以成大蓄诸微而至着若曰名以暴集为荣行以速成为贵谓片善为无益以寸长为可弃是犹冀合抱之林而不养其拱把之时望十围之木而不植於径寸之际者也

闲居赋

丁亥之秋余既反闾待次若不与世相闻者作闲居赋云释吏尘之鞅掌兮望吾庐而载旋野鹤脱於樊笼兮解病马於?编嗟余居何甚小兮聊复有此池园苟余意足有适兮岂必金谷与平泉余既浸以成趣兮画人事而与辨曰悠悠其莫往来兮垒柴门之苍藓朝吟芦花之白雪兮暮数渔舟之青烟时扪腹而徐行兮俄曳杖乎池边龟鱼识余之履声兮唼苹藻而不喧迟余步乎东畴兮或嘉蔬之葱蒨撷杞菊而将瓜芋兮袖雨露之微泫忽长风之吹来兮闢万柳之喧骈倾若相逾蹙若相鬬兮各献状而争妍余矫首而徜徉兮欲飘飘而俱仙穆室处之晏娱兮乐图书之舒卷耿青灯而深语兮下潜幽而穷玄惊倦仆之僵屏兮鼾夜床之对眠感晨鷄之呼觉兮怅流光之易迁於是懔然而起起而歌曰岁荏苒兮风露手种木兮今盘盘世我忘兮我寧忘世去来去来兮吾居不可久闲

大暑赋

盛夏之月龙宿明鹑火栖赤熒奋怒炎帝施威有客瞻翔阳之腾翥望火云之烧空气郁陶兮蒸体汗淋漓兮沾裳乃授简於崔子曰暑至此极矣抽子秘思骋子妍辞为余赋之崔子曰唯唯昔者侯湛成章于晋代繁钦流咏于东都在隋有卢生之丽句於魏摛子建之奇词仲宣仰庭槐而长啸孔璋寓陶烛以兴悲周人垂瘁暑之咏明远成苦热之诗皆所以发骚人之妙思歌隆暑之歎戲者也且夫勾芒既往祝融乃来紫纁丹幢左右从陪炎官热属前导後随朱冠缙顔嘘呵火维煽以烈焰奋以毒威御烛龙以长驱兮驾火轮而飞驰前执衡使举麾兮丽朱鸟而承旗环天地以为炉兮播造化於冶中运陰阳以为炭兮烁万物其犹铜采扶桑之高燎兮炽中街之朱光温风搅乎万里兮气郁烟而迷空土润溽以蒸熇兮时洏汨而蘊隆凝赤岑而耸岳兮闪红倏焉而惊虬丰隆盘旋而空鸣兮灝郊斐亶而复收於是陰壑烦寒谷焦冷泉沸水天熇玉井烟合凌陰埃生西域消长积之雪北极无不释之冰乘清风而游广寒兮广寒燠其增烦排闥阖而入凌兢兮凌兢翕焉如蒸天丁退听以屏息兮旱魃健行而肆志飞廉嘘以喘息兮吁号渴而欲毙丰山之神人心郁乎清冷之宫姑射之仙子汗浹乎冰雪之体噫神焦与鬼烂兮彼将焉其逃避若乃层潭之府极深之渊毒阳激烁陰火潜然熺炭重燔吹炯九泉与日喷薄流耀扬焰朱 綠烟要眇婵娟河汉沸兮若煮川渌涌兮如汤螭龙喘以鳞折兮

鯢鮪躁而甲张长鲸吓鰓以吐沫巨鳌暴骼而且僵沙石为之熟烂水恠为之糜扬虎蛟钩蛇遭鼎烹之毒象鹿狐貉有釜游之伤冯夷阳侯渴死乎重渊之窟马衔蝸蟻郁勃乎波涛之乡至夫沈阳腾射散越山林赫然其晖齐攻错陈原兮欲燎野兮欲焚木枯兮欲熬叶卷兮欲焦隆曦穿漏林无清陰视万木之结?犹火伞其迷云良田龟坼而尘飞兮泥涂化而为缙駢嗟空翔与陆走遭燂炰以飞奔鸟苦热而不敢飞兮惟塌翼而浴泥牛喘甚於焚角兮徒使人而增悲猛兽垂鼻以吐气兮韩卢露舌而涎垂蝇昼飞以繁案兮蚋宵集而侵肌烦蝉咽以噪风兮风既至其犹火鸣鳩应以呼雨兮雨不至而奚为於是陆有交盖河无行舟宵不明烛昼不远游食不饮渴衣不裘裘行者喝道而欲仆居者执热而露头负者澁旋而肩赧耘者肤裂而脂流走通衢兮如履乎身热之坂上层峦兮如陟乎阳谷之丘单絺甚狐貉之燠当风有环炉之忧冰台风轩如坐乎温室陰谷寒涧变而为炎洲饮寒泉以御渴兮渴不止欲化鲸而吞海气嘘吸以祛躁兮躁之极思凌云而上天佩壬甲之灵符兮於烦怀其奚益食鼯鼠之寒脯兮虽万斤为徒然又安可责效於抱朴不可热之药而服飞雪之散与夫元冰之丸者哉此少陵所以愿作冷秋菰昌黎所以思欲狽寒门袁绍所以有避暑之饮傅咸所以开感凉之尊者也词未竟客跃然而前曰子赋暑至矣读之若坐火井而居炭谷游焦溪而沐汤泉有可以清暑者得闻其说乎崔子曰大冥之墟孤相生焉下瞰冰渊之湄上直寒涯之巔左当风谷右临云谿遡九秋之惊飈凋三冬之寒威零雪积其根霏霜封其枝神泉漱其津清露润其皮此盖木之清冷而寒洁者也於是翦寒柯剖孤茎匠石运斤师襄均声寒水之玉以为徽冰蚕之丝以为弦水精之珥以为?精冰之金以为悬尔乃歌南风之古曲奏绿水之清音迸流泉之幽韵动积雪之悲吟弄羽则红云含霜叩商则烈日成霖跃流鱼於澄渊舞鸞鷟於庭陰此声音之至清也可以清暑乎客曰未可也崔子曰虚堂清室凉轩寒馆含寒露以植台迎清风而立观月牖对晃风棖萧疎左峙冰山右直雪宫睽罍庠豁闲敞开通危楼郁其将起遂凌虚而上跻鸟腾翅于薨标咸乘风而欲飞齐兽口以涌溜时梗概於滌池軼星辰于大半垂云回帶於焚楣伏棖檻以俯听闻雷霆之霍挥消雾埃于中天集微凉之澄清问素娥若有答察云师之所凭上飞闕而仰观正瑶光与玉绳尔乃蹑露舄开云扃凤箫吟鼉鼓鸣攀井干之 嶠登延阁之迢嶢引雄风于洞穴植仙掌於良宵拂琉璃之珍簟弄明月之圆绡动飈飈於翠帐散霏微於绮寮曜冰槩而发霜硎写诗人之风骚咏楚台披襟之语歌汉宫大风之謡此宫室之至清也可以清暑乎客曰未可也崔子曰雕胡之饭锦带之羹霜蓄之茹露葵之英藕菰蒲笋间之香芹银丝鱠鲫散雪飞硎筋以冰犀盘以水精庖霜淅玉满坐风生汲冷漬糲其清如水携彩籃於中园掇槐叶於高枝糅桃木之玉屑和寒滓兮与俱乃使元冥适咸蓐收调辛味兼芍药施和既醇色碧鲜以照筵相香饭以苞芦经齿冷以嚼雪人争劝于投珠志欲随於驤褭暇则饮夫屠酥献君王之寒殿荐开冰之清壶乃若卢橘熟素柰成陆采檿桃渊摘芡菱林珍水实错杂扶檠浮甘瓜於寒水沉朱李於清泉食曹林之新梅擘太华之芳莲壶盛甘醴之液坐列饮中之仙环曲池以流杯如长鲸之吸川及其至也酒罢更阑风留月轩试谷帘之絶品破龙焙之香团汤发云腴之醞盞浮花乳之圆濺七瓿之轻雪两腋凄其生寒此饮食之至清也可以清暑乎客曰未可也崔子曰洞庭长湖洪波翻澜长江会宗六月不暄溟漭渺沔汗汗泔泔即之无穷察之无边骇浪瀑洒惊涛飞湍崩云屑雨荡日连天雷奔电激鼓作砢岩望之者使人毛髮耸立心悸而胆寒尔乃命水客泛轻舟齐棹妓发棹讴奏淮南度阳阿篙工唱楫师和鞭蝸蝓憚蛟螭翫翡翠斩鼉鼉戮水豹殄鳞族招白鸕下高鹄然後乘劲风揭百尺泝洄沿流千里一息访乎蛟人之居入乎渊客之室造乎江妃之馆追乎海童之迹击长楫於中江想萍实之

复形访蓬萊之清居思汉武之所经临澄流而沾襟吊屈原与灵胥而又昧潜险搜瑰奇摸瑇瑁扞觜蠹剖明月之胎珠濯夜光之流离若乃浮情博览忘夕宵归浑星辰而涵泳俯仰与之俱迷观蓝田之出月吐元珠於渊骊泻千寻之缟练堆万顷之琉璃此游乐之至清也可以清暑乎客曰未可也然凄凉之色已动於眉宇之间崔子又从而言曰丘壑之胜林泉之奇南山之巔北山之□有风月以为助有云烟以相随有鸿鸟以为侣有田园以时耔有鱼钓以自适有琴书以自怡木欣欣而帷成泉涓涓而练飞清风飒其来临幽鹤乘而下之尔乃漱白石枕流泉傲睨乎风尘之表笑谈乎溪壑之间居水中以筑室葺荷盖以为房啓蕙帐兮松关縹琅玕兮成堂琢寒犀兮为镇缉薜荔兮为裳饮苍岑之玉醴?白水以为浆羞玉芝以疗饥餐沆瀣而为粮纫緑芰以为佩又缀之以蕙纓於是或命巾车或漾轻舟或窈窕以寻壑或崎岖而经丘或采蕨於崇冈或缙鱼於清流或濯纓于沧浪或开襟於山楼或鼓琴以自娛或弹铗而悲讴或脱帽以纵适或杖藜以遨游或掘云於嶓嶷之岑或采月于澄泓之洲此山林之至清也可以清暑乎客曰善吾之愿也崔子曰善则善矣而未大也请为子言夫清暑之大方今圣天子在上洒扫宇宙清寧乾坤仁风惠气灑刷上下无严威虐焰之刑以烁民之肌肤故其民漻然休然相安以生无星火疾驰之令以惊民之耳目故其民萧然怡然相嬉以寧无竭源涸泽焦熬峻急之征故其民得以润泽其家室无蹈汤赴火汗肌浹肤之役故其民皆得逍遥于田里恩同祥风翺德与和气游蒸而为清氛疏而为冷风垂髻戴白无小大无远近萧萧乎如游清凉之境太清之世不知暑之为暑也若乃渠魁元恶肆厥暴怒斲斲屠剔膏流节离之毒日作而人不得全其形体焚拆抵掎胁驱迫逐之祸日兴而人不得集其族类凡厥烝民莫不沸涌灼烂号呼惊蹈无有救止羣望而赴愬皇帝於是丕降霖雨雷厉风行天戈所麾咸顺使令旧染之俗攸徂之民徒奋袒呼壶浆以迎慰望云於大旱释僉苏於羣情救之火弃置之安平清暑之道不其大哉客闻之离席而前拱手而立再拜稽首霍然暑退

苦寒赋

日在斗岁将阑陰风怒愁云繁有广寒先生问於清虚子曰吾观子忧色无乃畏此苦寒乎子曰然先生曰吾以冰肌之质游姑射之山饮吸乎风露之冷绰约乎雪月之间吾居於此不知其年而子独以为难於是清虚子对曰皇天平分为四时兮寒暑运而相推春阳舒而花披兮夏风溽而云奇秋汉回以高洁兮夜月清而流辉惟穷冬之御冷兮重陰积而惨凄故傳玄寓兴于雅赋昌黎发咏於新诗张生陈冰涧之句阮子形冻海之辞梁臣寓直庐而发叹陆云当岁莫而兴悲斯皆苦寒之?畏寒之威先生夸物外之高忘人间之累谓寒为不足畏兹非余之所敢知先生闻之避席而起逡巡而言曰子之言是矣请子为我赋之清虚子曰可严霜夜结寒云昼起惊飈搅乎宇宙兮萧条亘乎万里乌蟾藏而寒辉兮雨雪飘而不止河汉涸而不流兮天地结而凝闭於是焦溪涸温泉水火并灭汤谷凝沸潭无涌炎风不兴死蛟螭於窟穴兮僵虎豹於林垧六龙冰而脱髯兮荧惑隐而丧精莫不血冻兮指不拈气藏兮唇莫收肌肤皴而生甲兮衣被冷而如流朱火青而光?兮兰膏凝而烟浮拥炉犹坐雪之冷兮重襟有怀冰之愁嗟顓冥之酷烈兮夫与我其何讐意烛龙吹於雁门兮又疑白鹤语於南州虽挟纊之言不足使楚人暖兮纵赐袍之惠何以解范叔之忧若乃孝子卧冰书生映雪意虽勤而不倦覩此寒而为辍洛生方拥被以沉吟兮宋人亦龟手而拆裂裸壤变为垂繒之俗兮华清不知探汤之热峻肩添诗客之思堕指凜三军之节我乃张重幄处温室衣狐裘坐熊席盛兽炭之春红

酌羔羊之琼液擷粉萼於新梅鱠银丝於鲜鲫侑以郢客阳春之曲吹以邹谷变寒之律先生於是懣然而服乃浩然而狂歌歌曰岁云暮兮风怒狂雨雪飘兮云沧浪乌蟾畏威兮为韬光地坼裂兮鳞甲张蛟螭潜兮虎豹僵温泉火井兮为凄凉江汉凝沍兮波不扬又歌曰燎薰炉兮阳和拥兽炭兮春多携佳人兮鸣玉珂酌桂酒兮朱颜酡一杯相属君当歌有酒不饮兮奈寒何

卷二

钦定四库全书

宫教集卷二 宋 崔敦礼 撰五言古诗七首

次韵张伯子饷柑

儒官窗户寒恹恹日出光独冷不可耐大杓倾鹅黄洞庭隔烟波忽惊风露香开门问谁与知君念荒凉芳包照盘新硬句摩天扬山中千头奴丹黄丽秋阳骚人巧采摘灿灿简册方君诗追古作语壮韵转强属和郢中人凋零不成行临风咏玉台嚬雾开蜜房殷勤此珍饷玩味媿莫当但酌潘公醪一举累十觴

对竹有感

庭前抱节君五年不见汝去时双玉槩枝叶稀可数归来儿孙多已满寸金土竹盛人凋零攀枝泪如雨

还孟郎中诗卷用元韵

吟哦两夫子濯濯春月柳金石相击撞论文自为友我欲和阳春高调不容口披玩若为称朝酣玉台酒富贵邯郸梦齿发金城柳附炎非吾事因心即我友得意自忘言咸膺岂滕口幸有君子交淡成非醴酒

严子文用范至能韵见赠再和

灯花昨夜喜诗成果符吉长跪读新诗绣筵鸣宝瑟天公怪多取未老雪满栴出门会臞仙戴笠卓午日我无作诗工而许编杜帙珣玞混圭璋蓬艾间粟稊鸥社媿相从敬行顺风膝

前用吉字韵问严子文疾再和问疾之诗不工甚矣既辱和章又承用吉字韵为贶率尔继作敬问起居公自谓平生不服温剂此寡慾之验也何恙不愈诗以见意

日来间何阔坐见月初吉欲往扣斋扉政恐劳取瑟闻公清净缘巧笑却银栴露骨秀寒松烘阳咽暖日鍾乳无千两牙籤堆万帙爱诗屡忘餐爱酒勤种秫心安身自轻却老非牛膝

再讯问严子文疾

清心止渊水养性顺杞柳不信造物儿能妨莫逆友我当诵七发澜翻倾辩口据几遂霍然何辞未能酒

七言古诗三首

泊福山港

我舟欲渡风伯嗔卷帆夜泊沧江津江声拍枕冷不寐起看河汉无纖尘须臾风定水波伏江妃涌起明月轮船头把酒问明月瓜丘粉社难忘情狼山咫尺望可到一水隔我三家村明月问之寂无语寒光耿耿如相亲明朝转柂好风色月晕北开箕有灵

喜晴

我贫可厌回肠煎负郭近有桑麻田入春十日九霪雨夜听泷泷愁不眠雨师欺压春无力勾引顽陰朝复夕丹杏夭桃冻不开来牛去马昏无色晓来鼓舞耕桑民长天洗净清无云羲和鞭日从海底照出浩荡郊原春呼儿买酒聚笑语门前且无吏呼怒今年麦饭滑流匙更趁新蚕理襦袴江头烟树晚戎戎江南婴笋春事丰我亦行抛簪绶去饱帆西上趁东风

九日

虎踞城边九日台前年黄花何盛哉去年今日瀨阳山三径荒芜手自删今年到此百愁有物情改尽花依旧花不能言心自知嚼蘂徘徊泪盈袖黄花时节年年好我生浩荡何时了桮沐从教饱风雨只恐飘零人易老客中霜风吹我衣陇头白云呼我归江湖僻处好归隐月上三更闻子规

五言律诗十一首

送梁倅二首

盛德宜时用屏星久此留中和凝柜鬯温润莹天球太府多材会清名万口流亨涂应好在端的上瀛洲一尉千官底公无势位分门墙时与进道义得亲熏去矣难留佩时哉盍致君南风秣陵路征旆卷行云

喜晴

顽云收四野皎日丽千门水响鱼龙落云高鸛鹤翻近阳书幌暖遶室篆烟昏拟欲寻春去梅花水际村

过三塔

妙墨人间宝千金纸上鷺频来湖上寺三复柱间题鹤化辞辽海鸿飞印雪泥人豪今不见凝伫夕阳西

固城湖

舟泊楚城下当风十顷湾凉生水监面人在玉壶间
隐见云端树低昂枕上山江湖有如此一笑白鸥闲

东坝

前夜湖山月今朝灏水船飘零良自苦浩荡有谁怜
云合前村雨风收别浦烟乘凉趣归櫂咫尺是金渊

客枕

客枕愁无寐悠悠夜未分谁同对床雨惟想太行云
黄犬行应健飞鸿过亦勤如何万金信别久寂无闻

邵智卿挽章

列宿郎官帐高风隐士庐岁寒知劲栢日暮厌轻车
德齿周三老身名汉二疏回头八男子玉立照堦除【公三子五孙】

未识嵇中散闻诗孔伯鱼谓当从几杖何意作丘墟
有道齐生死无心任卷舒斯人吾不见遗恨泪沾裾

赵提官挽章【子直尊人】

典型前辈近问学古人深有道祗藏韞无言自陆沉
忧民空白首爱主只丹心远矣平生志松风扫墓林
诚身古君子耆德老先生言行纯无玷经书富满簏
兰堦群玉秀桂苑一枝荣有後谁公比文盟压世英

七言律诗三十首

九月二十九日迓英开讲忝预末班讲退小集玉堂之庐即留宿直因赋唐律呈诸讲官

五云扶輦下清厢宝帙初开第一章旋卷班联回广殿
稍留笑语萃公堂紫霄近侍连镳过黄发元臣照座光
顾我自惭陪胜会酒清人散卧斜阳

殿庐纪怀敬用右史舍人韵

官柳陰陰密着行飞来黄鸟忽成双身沾仙露香犹在眼
饱珍羞赐即扛酒量不多容我醒诗

魔无奈得君降官闲睡足春风幕红日三竿看上牕

东宫寿章

恭遇皇太子殿下弥月届辰前星炳耀纪佳祥於甲观溢喜气於东朝某夙荷眷知属居蕃屏逢昌辰而有喜陪贺列以无阶敢伸重润之章用祝无疆之筭

少阳腾耀毓青宫玉裕渊冲穆睟容主鬯克承宸极重问安勤致寝门恭温文齿胄全三善晖润登歌备四重幼海光浮天序永珠源袞袞日朝宗

吹铜和气集佳祥郁郁葱葱震色苍山岳东明开宝禁星辰南极注瑶觞龙楼照日浮秋晓象辂朝天馥御香分土莫陪班贺末咏歌惟祝寿无疆

至清口闻水閼甚盛边人言辛巳岁敌骑逼淮刘信叔军南岸欲载神劲弩至中流射之求数舟不可得今战舰之盛前未有也因成四韵

晓日旌旗锦满川阿童初试汉楼船露桡天与神机秘擊楫人同壮志坚行恐黄河水可渡已闻青海箭先传佛狸莫梦淮边树看揽长蛟下没渊

题婺州仁风堂寄韩侍郎

丹宸忧勤德意通使君元侍玉皇宫亲传天上舜琴曲散作人间庄籁风已喜清微消滞郁亦知委曲到鰥穷骚人休复雌雄问千里而今乐事同

公余燕寝但凝香稍退朝来鴈鹜行政誉已争铜岭峻恩波仍带绣川长未应尚布春风诏会许重赓夏日章皎皎东阳嘉话在到公端类发天藏

江行迓宪使遇风

星使乘槎势若飞微官奔走遂忘危扁舟掀舞身如叶短棹欹斜命缀丝乱眼云山疑醉梦拍天波浪意蛟螭西风送我归渔浦落日衔山未晚炊

次韵孙抚干二首

踈狂自许次公醒冷淡无劳沸玉笙满屋文章天下乐多情灯火夜深明交情问我何清苦世路愁人已饱更好趁东风动行色瀨阳烟雨趣春耕

绕几黄云熟水沉得诗闲读契余心文章叔夜广陵散句法武侯梁甫吟且喜空囊收赵璧不慙击壤混唐音请君便入鸥鸣社饭颗相从始自今

次陆倕韵三首

欲将从事到青州酩酊乡中便可侯此乐正须君领略踈狂还许我追游一年好处都能几四序难并去莫留痛饮且图连夜醉清欢何必锦纏头

煖烟和气满西州载酒当轻万户侯官事不知何日了风光宜及早春游簿书丛里偷闲去景物妍时到处留莫被虚名苦拘束野梅官柳暗江头

文章光艳压苏州照乘何劳詫魏侯鸠杖欲寻江左胜鸥盟相约社中游囊空自喜陶朱得诗拙还因杜集留把玩日吟心似醉定须论月废梳头

再次韵一首

催花腰鼓彻凉州午枕惊回蚁梦侯赖有江山余古意可教诗酒负春游登亭举酒休论晋借筯成功合继留慷慨浩歌风日暖万山佳处接吴头

和沈商卿

一官奔走倦幽寻来向江山好处吟过眼风光花又落关情勲业镜频侵到头春事都无几飞盖长郊早趁今鸥鸟莫惊车马过我来搜句亦无心

和章冠之

光陰转眼去如飞闊过清游正及时春事到今难着语鸟声无奈只催诗日烘花气侵轩户风晃江光入酒卮回意总将西子看对山终日未成痴【时冠之有只欠蛾眉把屈卮之句】

狼山

裹了青衫簪了纓此身便是一浮萍五年客路春风熟千里乡关夜月明华鹤归来惊物变白狼依旧逼人清山中老宿争迎我辑杖相呼问甲庚

龟山

当年王气拥神州衮衮朝宗此地由自昔好山犹故色只今清泗漫安流苍烟鎖合神仙府宿藓封深魍魎囚病眼不堪重北望西风挥泪下扁舟

游龟山

舟行十日困拘拳到此登临意气掀山断蜂腰盘汉表水分燕尾入淮门石埋万古英豪笔洞

鎖千年魍魎魂怀昔感今无限意夕阳人去乱鷗翻

何家港舍舟步至新河口

潮来白浪卷平沙渐见菰蒲没两涯会欲燃犀鞭魍魎可能结网羨鱸鮓三千水击鷗鹏上百万军行将士譁惊叹渔人何活计扁舟掀舞寄全家

闻严子文纳妾孟守有诗辄次韵

春市笙歌兴已阑儒宫牢落分投闲不知列屋倾城蔡自笑微官系触蛮赤脚有年供侍侧青鸾无梦到人间传闻谪堕行云侣想像高唐鬓欲斑

挽太尉王权章

将军名字着华戎露甲曾收不战功马革裹尸忠贯日虎头食肉气如虹云屯欲倚金城重星陨俄惊玉帐空好象祁连筑新塚鼓鼙遗恨意何穷

七言絕句二十首

送芋酥与宿斋三学士

酥盘荐酒迎春壽芋火谈禅数夜更云脚四垂天欲雪为君两计破愁城

何家港舍舟步至新河口

夹岸芦蒿障日微拍堤波浪溅人衣隔江唤得渔船过贯柳双鲈自买归

郭公勾唤鲋浮水闲客招要鸥上滩岸断溪横人不到树头依约见桅竿【江岸有鸟名郭公渔人云此鸟一叫则鲋鱼出】

北岸行人南岸山去年人在乱山间山如相识须相笑底事区区未得闲【余去冬行东阳下蜀】

狼山

日日怀归今得归旧时风物未全非江边鸥鸟应相笑底事尘埃满客衣

贪恋微官未得闲二年乡梦遶狼山如今真个山中去不是寻常杳霭间

行携三尺虎臂杖归饮十分鱼枕蕉饮罢招船歌一曲冯夷亦合泣潜绡
夜静无风水自波隔江灯火数陵坡消樽不属今宵事奈此一江明月何
五载龙蟠虎踞间峯头日月望狼山归来筋力犹强健野屐登临莫厌艰
题得妙亭

行见山横坐见纵山随意好日无穷朝来爽气谁能会浑在先生隐几中
探潮阁

天留孤嶺岌青冥约束淮流入汴京往事不堪回首望倚栏斜日看潮生
题避俗轩

地僻便知城市隔心清自爱水云闲障尘不用西风扇香篆溟蒙正下关
题汗青轩

地禁官清静不譁日长时试小团茶一生只用如椽笔细为君王纪正邪
大閱回马口号

前驱小队立元戎一点台星喜气浓凯奏归来铃阁静精神端已折遐冲
芸香亭

竹间当日一亭幽瀹茗焚香向此留丹碧只今俱化出独来恋恋忆前游
密云亭

落花摇曳水溶溶金现兜绵世界容只恐水流云不见桃源归路却无踪
傲霜亭

霜风吹惨入园林零落堦前满地金赖有翠蕤堪采摘伴人犹守岁寒心
丁亥岁予留建康梦登大桥仰视霄汉有金书阁字北斗落落布列其侧昨夕夜直坐石渠桥

忽见七星低昂正倚秘阁而金书大字俨然梦中所见信知世事皆有定分非偶然也

秘宇涵风寒淦淦虚廊侵月静冥冥宝章玉座神深地应想谁何会百灵

青冥风露飞檐外黄道星辰企翼边独倚梧阴心自省十年清梦故依然

枕上

辗转孤灯梦不成念家忧国总关情月明定到棠梨上时有啁嘈格磔声

卷三

钦定四库全书

宫教集卷三 宋 崔敦礼 撰乐章

太祖皇帝师次陈桥受天命协人情为圣皇武

圣皇武愔显幽震逾恭翼微周帝下顾民噢咻糜沸鼎泛横流否其复飞龙秋挽天弧建神矛
振汨陈遏?刘潏然施鸿佑休燠以濡羸者瘳御皇极凝前旒徧胪欢荡岱丘

右圣皇武二十二句

刘鋹僭号岭南虐其民潘美伐之俘以献为猛虎攫

猛虎攫噬海隅跨峽绵岭环为鑪流膏解节民毕屠帝怒惠顾思往苏授以覲将施天诛长驱
无垠抵其郛手援炎歃吹以濡长纓系颈来累累撑骸脰肉穷凶徒观城告社咸嗟歔

右猛虎攫二十句

李煜不朝伐之煜降江南平为震雷薄矣

震雷薄矣胡蠅之营弥江负淮隩天险矣宁曰我尽臣度肃恭威灵宇宙混同一方阻皇明建
灵旗下巨舳震威而怀靡事戕戮王师如翰至则速风瀚雷磕奄其覆哀哀逆俦维喙乞降櫟
车青盖朝帝乡妖氛杀翳旋披攘膏痿腥?德泽滂凯旋金声奏洋洋輝燿万国俱向方

右震雷薄矣二十八句

歌词十四首

太白远游

太白远游者崔敦礼所作也太白在天宝间当高力士杨国忠之徒用事不能俛首以同俗浮
游四方浪迹自肆咏歌之际类多托配仙人与俱游戏周历天下放意寥廓无所不至太白岂
无意於世者忧思愤郁假以自适其屈原远游之意欤敦礼游当涂吊青山之墓因集其言櫟
括为楚词命曰太白远游云

人间不可以托兮【悲清秋】 信长风而云行【游泰山】 浩漫其将何之兮【寻范居士】
怅飘忽而徂征【淮陰书怀】 天生材以有用兮【将进酒】 思逢时而经纶【梁甫吟】 苦

恩疎而媒劳兮【答裴侍御】坐长叹以抚膺【蜀道难】鸡聚族以争食兮凤孤飞而无隣
【鸣臯歌】璫草隐於深谷兮层丘蔽以苍榛【古风】骅骝拳局而不得食兮蹇驴得志以
鸣春【答友人】蝮蛇嘲龙兮鱼目混珍嫫母衣锦兮西施负薪【鸣臯歌】世道有此翻覆
兮【感秋】谁察余之坚贞【雪谗】块独处此幽默兮【鸣臯歌】乃龟息而虬蟠【孟少
府书】不旷荡以纵适兮何拘挛以守常【大鹏赋】将倚劒乎天外兮欲挂弓於扶桑【孟
少府书】以倥偬而为巢兮以虚无而为场【大鹏赋】运以大风之举兮假以摩天之翔【
杨右相书】前期浩乎漫漫兮【敬亭山】浮四海而横八荒【孟少府书】赤玉舄以东上
兮烟苍苍其逢山【古风】逢羽人於天门兮方瞳好其容颜遗我书以鸟迹兮读不闲而三
叹【游泰山】偶然值乎青童兮绿发双双其云鬟笑我学仙之晚兮蹉跎凋乎朱颜【游泰
山】玉女飘飘而下兮遗我以流霞之杯稽首拜而自媿兮弃世何其悠哉【游泰山】随风
恣其飘扬兮【古风】不知东走之迷【赠范金卿】忽抚己而自笑兮【古风】问南登之
路岐【灞陵行】采姹女於江华兮收河车於清溪【送权十一】卧香炉以餐霞兮【书怀
】窥石镜而心清遥见仙人於彩云兮把芙蓉於玉京期汗漫於九垓兮接卢敖於太清【庐
山謠】乘兴任夫所适兮【叙旧】鸣驄忽其西驰【送刘副使】栽若木於西海兮【上云
乐】采琼蘂乎崑山【古风】揖叔卿於云台兮恍惚凌乎紫冥【古风】饮玉浆於丹丘兮
备洒扫以明星【西岳云台歌】赤松借予以白鹿兮挟两龙以相从【古风】传秘诀於韩
衆兮精诚与夫天通【登天柱石】西上既穷其登攀兮【登太皇峯】云飘然而无心【酬
王司马】八极可以神游兮赋大鹏於北溟激三千以崛起兮向九万而迅征【大鹏赋】访
广成於至道兮闻大块之幽居掇玄珠於赤水兮天下不知其所如【大猎】登云霄以直上
兮【南轩松】入无穷而遗形【登天柱石】骑日月而羽化兮翼鸳鸾而云行【敬亭山】
出宇宙之寥廓兮【孟少府】徂闾阖之峥嵘【大鹏赋】戴长云之河车兮【飞龙引】十
二楼与五城【书怀】登真朝於玉皇兮【赠从弟】赐琼浆以玉杯【古风】听天语之察
察兮【明堂赋】廓如云而天开【叶和尚赞】天地同乎枯槁兮【宋少府】生世如乎转
蓬【効古】君子化为猿鹤兮小人或为沙虫【古风】营营为何所求兮鸡鸣趋乎四关【
古风】十步而九太行兮【望瓦屋山】世路多乎险艰【古风】传其语以铭骨兮【古风】
永愿辞於人间【望庐山】忽魂悸以魄动兮【游天姥】即归路而长叹【献当涂宰】
转天车於六龙兮【赠裴十七】云骈下而飘飏【春日行】风为马兮霓为裳【游天姥】
靡星旃兮【大猎赋】迴鸾车【游天姥】烛龙衔光以照物兮列缺挥鞭而启途歛翳景以
横翥兮逆高天以下垂【大鹏赋】望四海兮何漫漫【古风】长相思兮在长安【长相思
】复长劒而归来兮【寄丹丘子】谒九重之天门【赠从弟】白日照吾之精诚兮【梁甫
吟】效剖胆而输肝【行路难】吐峥嵘之高论兮开浩荡之奇言【大鹏赋】所谓代马不
思乎越兮越禽不恋乎燕【古风】流波思其旧浦兮落叶坠於本根者也【谢赴行在表】

太白招魂

太白招魂者崔敦礼所作也敦礼既作远游又念太白自知不容於时益傲放不羁以自昏秽
时无宋玉不能作招魂之辞以复其精神而风其上徒於咏歌之际外陈四方之恶内述长安
之盛忧时爱主有屈原大招之遗风吁其悲夫因集其言櫟括为些语谓之太白招魂云

子为谪仙兮【忆贺监】薄游人间【送张祖序】傲岸不谐兮【答友人】世路艰难【古风】折芳洲之瑶华兮【寄情人】采琼蘂入乎崑山【古风】愁长安之不见兮【登凤凰台】坐拂劒而长叹【送窦司马】魂一去而欲断兮与春风而飘扬【惜余春赋】飘扬其竟何托兮【古风】造化为之悲伤【古风】於是帝命巫阳【招魂辞】若有一人【愁阳春赋】神气黯然【恨赋】精魂飞散【李长史书】迟尔归旋【送二季】乃下招曰魂兮归徕无东无西无南无北些【大招辞】碧海之东长鲸瀆涌不可以涉些【古有所思】扬波喷云蔽天髻鬣些【古风】齿若雪山挂骨於其间些【公无渡河】归徕【招魂辞】去无还些【远别离】魂兮无南【招魂辞】南山白额穷奇羆狨些牙若劒错鬣如丛竿些口吞殳鉞目极枪櫓些【大猎赋】归徕【招魂辞】饲豺虎些【古风】魂兮无西【招魂辞】西当太白横絶峨嵋些地崩山摧天梯鈎连些峥嵘崔嵬朝虎夕蛇些磨牙吮血杀人如麻些【蜀道难】归徕【招魂辞】行路难些【乐府】魂兮无北【招魂辞】北缘太行磴道峻盘些马足蹶侧车轮摧冈些气毒劒戟严风裂裳些【北上行】归徕【招魂辞】北上苦些【北上行】魂兮归来君无上天些【招魂辞】天鼓砰訇雷震帝旁些投壶玉女笑开电光些风雨之起倏烁晦冥些【梁父吟】犬吠九关杀人以愤其精魂些【书情】归徕【招魂辞】天路何因些【酬崔司户】魂兮归徕君无下此幽都些【招魂辞】闭影潜魂【恨赋】遗迹九泉些【望瓦屋山】劒轮汤镬猛火炽然些【大鍾铭】疑山炎崐苦海滔天些【尊胜幢颂】归徕【招魂辞】保吾生些【秋赋】魂兮归徕【招魂辞】还故乡些【古风】高楼甲第连青山些【南都行】飞楹磊砢栱夤缘些云楣横绮桷攢栾些皓壁昼朗朱蕤鲜些【明堂赋】金窗绣户朱箔悬些【散花楼】魂兮归徕【招魂辞】列珍羞些【汪氏别集】月光素盘饭雕胡些【宿荀媪家】鲁酒琥珀紫锦鱼些【酬中都小吏】白酒新熟黄鸡肥些【别儿童】山盘秋蔬荐霜梨些【寻范居士】吴盐如花皎白雪些玉盘杨梅为君设些【梁园吟】魂兮归徕【招魂辞】恣欢谑些【将进酒】南国美人芙蓉灼灼些【古风】洛浦宓妃飘飘飞雪些【感春】长干吴儿艳星月些【赵女辞】西施东邻秀蛾眉些【効古】一笑双璧歌千金些【古风】琅玕绮食鸳鸯衾些【寄远】博山炉中香火沉些【阳叛儿】魂兮归徕【招魂辞】醉壶觞些【早春】青娥对烛俨成行些【赠江夏太守】玉童两两吹紫笙些【古风】佳人当牕弹鸣箏些【春日】玉壶美酒清若空些看朱成碧顔始红些【前有樽酒】连呼五白行六博些【梁园吟】赤鸡白狗赌梨栗些【行路难】半酣呼鹰挥鸣鞘些【行行且游猎】金鞍龙马花雪毛些霜劒切玉明珠袍些【白马篇】魂兮归徕【招魂辞】入长安些【东巡歌】清都玉树瑶台春些【拟古】万姓聚舞歌太平些【春日行】伐鼓槌钟启重城些日照万户簪裾明些骑吹飒沓引公卿些【鼓吹入朝曲】白日紫晖运权衡些【古风】倒海凌山索月采荇些【书情】文质炳焕罗星旻些【古风】魂兮归徕【招魂辞】乐不可言些【飞龙引】乱日长相思兮在长安络纬秋啼兮金井栏【长相思】望夫君兮安极我沉吟兮叹息【劒歌赋】怀洞庭兮悲潇湘【惜余春赋】把瑶草兮思何堪念佳期兮莫展每为恨兮不浅【同上】荷花落兮江色秋秋风嫋嫋夜悠悠【悲清秋赋】魂兮归徕【招魂辞】谢远游【江上秋怀】

九序

九序者崔敦礼所作也敦礼居江东江东之民好祠信鬼有楚之遗风歌乐鼓舞独无楚人凄

惋之词以侑祀事因访其地作为九序之歌上以陈事神之敬下以见修身行己之志云

春日兮繁鲜车阗阗兮句曲天絙瑟兮拊鼓满芳菲兮琼筵朝霞为羞兮沆瀣为醴瑶华玉馔
兮错襟而陈前灵之来兮赤城空驾白鹤兮御清风羣仙从兮哆哆云暧暧兮车隆隆灵之去
兮返太清骑日月兮朝紫皇下视九州兮尘泱茫五岳俎豆兮四溟杯觞制琼琚兮余衣集芳
荪兮余裳荷佩兮离离兰旌兮扬扬欲往从兮未得望夫君兮彷徨

正曜

若有人兮水中央鱼鳞衣兮白蜺裳荃桡兮桂旗欲女迎兮风薄之神之驾兮两龙骖白鼋兮
蛟螭从朝余陟兮三山夕济兮牛渚神不来兮夷犹使我心兮苦复苦濯纓兮姑溪结佩兮采
石诚不已兮幽通信不坠兮物格若有临兮风飏飏作暮雨兮愁江臯神交兮意接来不言兮
去无迹倏雨歇兮云收山青青兮水悠悠

华阳洞天

云冥冥兮叠嶂君独立兮山之上石磴险兮水道寒思夫君兮未敢言无言兮皇皇山阿之人
兮告我以不难木樛蔚兮下俯石避碍兮行旁余冠兮巍巍余步兮逶迟俛首非吾之愿兮斜
径其将安之朝骋望兮昭亭夕宿兮双溪网蕙茝兮为盖葺荪蘅兮为车欲腾驾兮高翔恍导
余兮上躋揭北斗兮奠椒浆簸南箕兮羞琼蘂灵欣欣兮顾余亶正直兮为神予

中水府

泛泛兮吾舟沛吾乘兮东流东流兮何之有美人兮天一涯烟杳杳兮南徐云连连兮北固海
何为兮清明江何为兮流注彼美人兮山之曲镇龙关兮转陰轴约束海若兮呵水冯夏不苦
雨兮冬不疾风污邪穰穰兮海沂阜丰我民报事兮罔有不恭采秀实兮山巅擷芳馨兮涧底
霜粦兮水芒蕙肴羞兮椒糝神之格兮乐享惚蜿蜿兮来止

下水府

鍾山岑兮江之湄药为祀兮辛夷祠神乘白马兮执素羽朝与日出兮暮云归噫嗟兮明神烈
烈兮用光生乎疾盜兮奋不顾死死焉助顺兮赫然发灵湛清尊兮明水扬玉桴兮扣雷鼓扣
鼓兮如何我欲言兮汨滂沱懷有妖兮蟠中土杂蘅臯兮秽兰宇豺豕兮人居猓兮室庐愿神
我福兮我祥举长矢兮射天狼使河洛兮回波令岱华兮还光山苍苍兮水汤汤神之威兮俨
不忘刳肝为辞兮沥血陈神之听兮闻不闻

田间辞三首

朝余往兮东畴景翳翳兮云油油牛驱耕兮载泥重鞭不前兮挽犁用岁云暮兮暮维何仓庚

鸣兮布谷和疾吾耜兮固吾耒趣甘泽兮及时播

我耕兮我田雨浪浪兮雷填填水漫漫兮种不下出门见水兮泪滂沱惠我晴兮疾耕而耨螟
败之兮颖弗得秀呜呼我无时违兮时不我予时不予兮奈何蹇无忘兮吾事

数稻兮登场牵牛兮入屋噉咷兮田家欢迎兮稚子三年力耕兮今逢年庾则实兮庖有鲜草
藉兮陶盘幽吹兮土鼓握牛兮谁歌和之兮余舞乐复乐兮岁晏冰雪集兮堂下时亹亹兮不
再荪何为兮田野

北山之英

强敌骄兮晋多垒忽登山兮望廷尉风霾兮杀气昏突枪櫓兮乱钩陈予君麾兮从君钺战陵
西兮扞溪栅虹食垒兮火焚旗公之死兮去如归公有子兮愤争先勇没地兮羞戴天父死忠
兮子死孝令名扬兮日月照物有始兮岂无终得所归兮孰如公喜幸生兮畏义死语昵昵兮
顾妻子草木尽兮粪土委闻高风兮汗流趾

楚州龙庙迎享送神辞

绍兴辛巳金人尝以锐师楼船蔽海而下欲以奇袭我将臣李宝受命迎拒既下海即沉牲酹
酒祷龙神而行事还具上神之诡异以请於朝天子既推功不居报礼上下则惟有神之功厥
尤彰灼下其事淮南漕司择傅海地建庙乙丑三月楚州盐城县告庙成漕当以上命往祭某
既以漕檄为文又私自作迎享送神辞三章遗县令使岁时歌以祀之

君之来兮殊廷雷隆隆兮雨冥冥从天吴兮罔象纷万怪兮如云若有物兮震奔沛吹逆浪兮
扬回旌授天矛兮下讨披蒙雾兮祥氛地平天静兮日月清明我民蒙福兮万年报禋

辛楣兮药房兰栟兮桂楹翼翼兮新宫穆将进兮芳馨栢实兮松液芝华兮若英奠琼斝兮清
醑玉俎折兮嘉牲雅声兮远绍锵和兮鼓钟纷繁会兮竽笙灵连蜷兮须摇傍暗藹兮纷纭
洁我心兮恭事灵欣欣兮燕宁君之去兮朱宫乘飞云兮御回风贝阙兮丰敞金台郁兮穹隆
珠胎兮炫耀周玉树兮青葱天琛兮水碧衆宝萃兮玲珑良辰兮高燕命冯夷兮展舞阳侯兮
海童羣仙兮启路君肯临兮尚春容君不我留兮我心忉忉紉清思兮幼眇惠我民兮盍终

诗余六首

壽词【柳梢青】

惊世文章门户照人外家衣鉢多谢温存相期宅相此恩难说
今朝祝壽樽前共拜舞诸孙下列但愿从今一年强似一年时节

壽词【西江月】

暖日江南梅柳春风堂上笙歌满斟醺醪笑声譁再拜千年壽嘏
清健非缘服玉红颜不是苍霞仙姿福祿自无涯要看沧溟绿野

时夫人壽【鷓鴣天】

本是瑶台月里仙笑麾鸾鹤住人间蟠桃一熟三千岁剩对春风日月闲
綰绶结彩衣斑孙枝相应傍门阑年年同上长生酒得见沧溟几度乾

王母瑶池景物鲜蟠桃华实不知年天教把定春风笑来作人间长壽仙
披縑笈诵云篇朝朝香火篆炉烟只将清静为真乐合住春秋岁八千

和徐尉【念奴娇】

吴淞江畔对烟波浩渺相忘鸥鸟日日篮舆湖上路十里珠帘惊笑高下楼台浅深溪坞着此
香山老辘川图上好风吹梦曾到不用金谷繁华碧城修竹自比封君号万壑千岩天付与一
洗寒酸郊岛霖雨方思烟尘未扫合挽三江倒功名遂却来依旧华表

垂虹桥亭词【水调歌头】

倚櫂太湖畔踏月上垂虹银涛万顷无际渺渺欲浮空为问瀛洲何在我欲骑鲸归去挥手谢
尘笼未得世缘了佳处且从容 饮湖光披晓月抹春风平生豪气安用江海兴无穷身在冰壶
千里独倚朱栏一啸惊起睡中龙此乐岂多得归去莫匆匆

送凌静之【江神子】

吴王台上雨初晴远烟横柳如云门外西风催踏马蹄尘声断阳关人去遮落日向西秦
不教容易纵归程语酸辛黯消魂且共一樽相属莫辞频後夜月明千里隔君忆我我思君

<集部,别集类,南宋建炎至德佑,宫教集>

卷四

钦定四库全书

宫教集卷四 宋 崔敦礼 撰表二十五首

进经筵彻章诗表

圣治崇文远稽先训经筵进读荐及终篇庆千载之昌期昭一时之殊遇敢形歌咏用侈恩荣中谢臣等伏以皇家开久大之基章圣袭隆平之业澶渊振凯泰岳升中治定功成光於前烈忧深思远启我後人爰集要言是成正说永思厥道咸聚此书臣等胥荷简知并参亲近缘袍中御瞻康色之咨询锦几前陈罄微言之紬绎适缘幸会遂毕华编讲天圣之旷仪举绍兴之盛礼诸儒拱侍四近环观旨酒嘉肴退集蓬山之燕名香异茗出颁御府之奇既均厚於眷慈复第分於宠锡象简称横金之贵珍奩加瑞石之良捐以名驹被之沃饗恩施一日风动四方兹盖恭遇皇帝陛下神智旁通天仁安运声色玩好无所贰其心钦明文思不忘典於学载周简册仅閱岁时彼汉世之召公卿但闻於称引越唐朝之选耆硕姑备於阙疑历考前闻莫逾今日於穆不已厥修乃来臣等俯愧浅闻仰承异眷拜陈庭之赐共欣儒术之逢辰诵报上之章各効忠臣之归美

贺皇帝登极表

?奉慈谋嗣登大宝文王孙子罔不或承高庙神灵云胡不喜中贺皇帝陛下仁孝恭俭率履清躬神圣文武一似艺祖膺上皇主鬯之重积兆庶系心之勤於昭於天乃命以位功盛德厚居帝位惟允宜仁滂泽洋与海内且更始臣叨逾偏郡际会昌辰北面覲而东面朝阻陪末序西向三而南向再钦想盛容

会庆节贺表

鸣社开祥千龄有赫呼嵩请祝九宇同寅中贺恭惟皇帝陛下濬哲生知圣明天纵建中立极能保惠於庶民申命用休俾缉熙於纯嘏星虹纪旦日月增华臣仰误隆知叨分望郡百福千禄但歌周雅之篇万壽称觴阻预汉庭之列

会庆节贺表

天佑民而作之君祥肇开於甲观臣归美以报其上祝敢效於华封丕昭星渚之休恭致露囊之献中贺恭惟皇帝陛下英谋天纵圣德日跻协帝重华继离明而布照握枢临极主震器以居尊宗社储禧臣民溢喜指南山而共祝望北阙以欢呼臣弭节江干驰诚天陛千官班後阻瞻龙袞之光万岁声中遐想凤楼之晓

会庆节贺表

紫枢旋电丕焕昌辰金监封章敷同善颂後璿穹而贡祉包輿地以储禧中贺恭惟皇帝陛下智勇自天英明冠古体元出震万物覩而风云从立极乘离四时行而日月照光鸿图而增炽履庆序以丛休臣谬领州符欣逢圣旦五百里侯甸参螯拚以无阶八千岁春秋睇日升而介壽

会庆节贺表

穹昊储休丕焕紫枢之瑞圣神接统有开赤伏之祥弥月斯临际天共庆中贺恭惟皇帝陛下离明布政乾健凝图总壹权纲宣大猷而执竞奋熙宪度体皇极以建中庆绪光华灵祺纷郁臣误膺隆眷出典近藩奉万年之觴阻与清班之末献千秋之监但祈神策之增

会庆节贺表

艺祖开基七世启云孙之圣上皇与子两丁炽火德之祥绍二帝之昌图仆万年之景命恭惟皇帝陛下龙飞首出虎变文昭鍾三光五岳之灵膺千载一时之运雷电而感高祖夙彰幽显之神交天日而表太宗足使英?之胆落即正神州之御永严太极之尊臣身留万国之西目邇九霄之上生圣人而为主虽谐夜祷之诚对天子以扬休莫预听朝之庆

天申节贺表

宝殿奉卮喜际流虹之旦露囊献壽用伸呼岳之诚中贺恭惟太上皇帝陛下道大难名功成不有怡神昭旷凝宇定之天光观妙希夷收雷声於渊默後乾坤而贡祉括海岱以丛禧臣谬领使轺欣逢诞节四方来贺获陪特室之朝万壽无疆恭致封人之祝

天申节贺表

玉卮介壽仰天子之有尊金监披章効封人之请祝乾坤隤祉宇县胪欢中贺恭惟太上皇帝陛下甄陶商周糠粃尧舜凝神昭旷道荡荡以难名观妙希夷孰敝敝而为事安受珠宫之奉坐膺神策之增臣叨守辅藩欣逢诞节五百里之侯甸朝特室以无阶八千岁为春秋企中嵩而呼寿

天申节贺表

汉殿奉卮欣际千龄之盛尧封祝圣用伸万壽之祈中贺恭惟太上皇帝陛下观妙希夷凝神昭旷功成不有退安特室之游道大难名诞播康衢之咏塞乾渊而寢福括海岱以丛禧臣叨领使轺获逢圣旦崆峒得道固莫测於修龄嵩岳传呼徒有勤於善颂

谢赐夏药表

炎燄流金重軫乘边之士名方飞雪遽颁解愠之仁祇服闵劳顿忘憚暑中谢伏念臣等职当汗马志在饮水属疆事之晏寧不闻侵镐乐军书之清静无复渡泸陈力已羞记存何幸兹盖恭遇皇帝陛下翦须义重?樾恩均燕御高明方理熏琴之化顾嗟戎役不私水殿之凉灵剂一颁清风四袭臣敢不推扬德意训厉师徒水居而蝮蠱生时难亡於暴武穴处而鸢跼墮志终愿於褻尸

代平江魏丞相谢赐银合夏药表

三伏炎曦属谨侯邦之职万金良剂遽颁御府之珍祇服闵劳顿忘憚暑中谢伏念臣奋身寒苦遭世清平报荅隆知志有饮水之节饶逾高位功无汗竹之书兹分牧於辅藩庶奉扬於德化敢缘歆郁重軫慈怜兹盖恭遇皇帝陛下?樾覆民熏琴阜物含风昼永靡私殿阁之凉扇暍仁均曲记庙堂之旧名品宠颁於飞雪湛恩深浹於零萧臣发驿端披启衽下拜簿书丛委坐消浹背之烦条教简稀用底清心之治

吏部进新修七司条令表

选部成书备正七司之典丹书奏御仰尘乙夜之观重冒聪闻冀垂睿鉴窃以總三铨之流品最为业钜而事丛示万世之宪章必也法全而令具属此承平之久纷然建请之烦千门万户而吏得出入其间玩岁愒时而士多睥睨於此当上圣解弦而更化俾下臣秉笔以裁规讨论润色咸竭其劳简要清通庶行於久深斥圣书之陋谩希姓历之修陛下躬揽权纲兼總条贯月成月要明八柄以驭臣官法官常揭九章而布治臣仰凭成筭仅及终篇萧何规而曹参随当共遵於先矩神龙案而开元理将高掩於前猷

代江东漕臣贺皇帝降嫡皇孙表

皇穹锡美式彰保佑之休朱邸发祥遂启衆多之庆凡居覆载孰不欣愉中贺臣闻侍膳问安於周文而专美宜民受祿在成王而独隆未有方躬孝养之勤而乃已见燕贻之盛恭惟皇帝陛下继明离照协帝重华荡荡巍巍光绍配天之业皇皇穆穆遂开磐石之宗臣喜际休嘉惟勤祝颂不显亦世子孙更茂於亿千於万斯年历数岂惟於八百

代江东漕臣贺太上皇帝表

殊宫引养受帝祉以方隆奕世蒙休诒孙谋而益远事关庙社喜溢人神中贺臣闻男子之祥实曰人间之喜曾孙之庆尤为圣祚之光在亘古以未闻於今时而乃见恭惟太上皇帝陛下道参盛帝德冒生民独高揖逊之风浸衍延洪之福炽而昌昌而炽膺壽考之万年孙生子子生孙畅本支之百世臣欣逢盛事阻造贺班瓜瓞方绵坐看云来之庆萝图有永卜知年世之长

代平江守臣贺淳熙改元表

升禋泰畤具辑神厘涣汗端门载新年纪邦图增固海县均欢中贺恭惟皇帝陛下睿智日跻圣明天纵昭受三灵之祝规恢奕世之基发号更元冠鸿名而有赫同文布政垂宝历以无疆臣叨守近藩欣逢盛际奉三朝之图籍阻预进趋法五始於春秋惟勤颂咏

代浙西仓使贺淳熙改元表

圣运凝休丕扬光烈王正谨始肇易鸿名极载畴以同文絶古今而冠美中贺恭惟皇帝陛下离明继照乾健当天居正体元總权纲而执竞宅中图大宏祖业以重光爰因岁号之更用布皇猷之焕臣误将隆旨欣际昌辰过於七百年豫卜周基之永不以一二数窃瞻汉历之新

代平江守臣谢上表

理寺祥刑偶寛谴斥辅藩择守遽被俞咨惟郡剧而材疎且人凡而地要任非所称荣不盖惭中谢伏念臣智识庸虚艺能短浅沉迷州县徒閱岁时扬历班行莫裨尘露谓弃捐之已晚曷选用之敢希况所领州实为会府无穷之费何翅於漏卮有尽之藏几同於垂罄士亡继廩师乏见粮正须经画之规上释焦劳之虑岂臣愚戇足备简求恭遇皇帝陛下盛德溥临至明旁烛知臣早亲於吏事粗达民情谓臣久次於卿曹靡干官谤爰膺眷记擢畀烦难臣敢不策励弩疲勉思夙夜赴功趋事庶兴颓弊之风足用爱民谨布寛平之政

代平江守臣谢赐御书戒飭手诏碑本表

诞布纶音竦风雷之鼓舞载颁宝墨仰云汉之昭回拜赐知荣窥文增惧中谢臣闻易敝有位邦用辑寧周迪厥官民其康乂眷言治本允系士风惟习尚之既淳斯事功之克建恭惟皇帝陛下离明布政乾健御天揔揽权纲将丕凝於庶绩细书诏札用申飭於羣工刻琬琰以无穷垂日星而有烂河图洛书孰窥宸翰之精周诰商盘咸诵王言之大臣濫膺寄委与被恩班佩服终身誓竭弩骀之力珍藏十袭岂徒篋笥之光

代浙西仓使谢御书戒飭手诏碑本表

叨持星节方披九地之图宠拜云章祇奉十愆之戒观瞻荣耀伏读凌兢中谢臣闻易俗移风圣神之能事视仪听唱臣子之至情属兹积弊之乖上轸焦心之念出丝纶之命具播於尧言刻琬琰之文载均於周賚凡居厥位罔或不勤恭遇皇帝陛下离照当天乾刚布政茂建非常之业大明责实之方一札细书敝於有位百辟卿士各黜乃心期益励於官箴更荣分於宝轴窥文增竦振鼓舞於雷风传玩无穷灿光华於奎壁臣濫司澄按与被恩颁佩服终身誓竭弩骀之报珍藏什袭岂惟篋笥之光

代谢赐历日表

课验畴人书成太史更程时叙得先後天之宜紬绎日分正大小余之次吏因作事民获趋功
中谢恭惟皇帝陛下统辑化工混齐政纪诞膺神?合四千岁之上元综覆清台定八百年之差
日缉熙昭度宣布同文臣敢不动静稽参夙宵祇奉按图识候知春秋晦朔之期?诏劳农授夷
隩析因之叙

代谢赐历日表

启驿端披奉书下拜具知早晚罔失初常中谢臣闻尧定四时钦于历象舜齐七政审厥玕衡
惟气叙之无讹斯民宜之允协恭惟皇帝陛下抚辰凝治作极体元後天而奉天默存辅相底
日不失日用谨候程爰颁告朔之文式致授人之敬臣逢时用夏率赋颁春遵以务农不爽窃
脂之候顺而作事自消伏蛰之凝

代谢赐历日表

岁龠方春历书颁朔式谨王正之始具昭民事之宜下拜知荣仰承惟恪中谢恭惟皇帝陛下
抚辰凝治作极体元後天而奉天道默存於辅相底日不失日叙必正於初常爰分命於庶邦
俾咸遵於丕则臣敢不夙宵深考动静详观宣化难穷虽自惭於己学诏条恭布当申饬於农
功

代陈丞相郊恩加食邑实封表

泰坛高燎丕荐明禋兑泽旁流式均大庆褒嘉所暨震惧为深中谢伏念臣遭际非常进登踰
分岁月已晚无薄効之可论夙夜靡遑念隆恩之未报方涤牲而祇事属怀綬以载行旅币献
球莫修於贡入奉璋执豆阻与於骏奔迨熙事之备成乃鸿恩之误及增封衍食叠宠骈休此
盖恭遇皇帝陛下功格乾坤诚通幽显圣能飡帝既并贶於三灵福用锡民俾均欢於四表敢
期刍豢亦畀微躯自省无劳尚媿翟閤之役莫知图称独殫犬马之恩

代建康陈丞相乞致仕表

顷上囊封深期得谢仰膺纶诏遽俾断章既感恋於恩私乃因循於时叙不胜衰羸之疾再伸
危迫之诚中谢伏念臣猥以庸才出逢休运周旋中外曾无毫髮之功荏苒年龄已迫桑榆之
景老将疾而偕至神与力以俱殫所宜待尽於穷阎詎得过尸於荣禄昨披悃悞愿上印章乃
烦训谕之温曲示抚存之厚虽恩慈广大未忍弃捐而灾病侵陵实难强勉近从新岁益困旧
痼形骨支离几同於槁木视瞻茫昧但见於昏花进趋愈觉於龙鍾思虑多成於废忘藩维寄
重岂疲茶之能胜管钥任严非耄衰之宜处傥不求於休谢必将速於颠隮载惟古者告老之
臣本以心存知足之义迹深嫌於避事志切戒以沽名幸此安平固匪辞难而欲去有如朽蠹
自甘没世以无闻惟思反於丘园庶少延於喘息伏望皇帝陛下仁深恻隐明烛幽微悯其垂
尽之年久婴衰疾察此再三之恳诚匪虚文特颁涣汗之恩俯遂乞骸之请俾得优游晚节涵
泳圣时终全畎亩之余生永荷乾坤之大造其为荣幸曷究敷陈

牋三首

代江东漕臣贺太上皇后牋

母道夙隆克膺多福庆流浸远诞育曾孙喜溢两宫欢均万宇中贺恭惟太上皇后殿下躬行柔顺德备谦恭播太任之徽音神无恫怨鍾文王之孙子国茂本支閱兹四世之休相乃万年之祚臣属将使指莫造外朝朱芾斯皇想动慈顏之悦景命有仆永观丕绪之光

代江东漕臣贺皇后牋

兰殿椒房夙深积庆金枝玉叶有衍储休中贺恭惟皇后殿下昭示母仪顺修陰教德嘉嫔於妨汭祥袞庆於文孙浸隆盛大之基益固灵长之祚臣属持使节阻造外廷咏芣苢之诗化已成於和乐诵螽斯之什福更享於衆多

代平江守到任谢东宫牋

九棘平反已污近列一麾分牧复玷名藩祇荷宠灵惟深战惧伏念某艺能譎薄智术迂疎顷备属於南衙获承顏於东禁浩穰天邑裨贊何功登进月卿侥踰已甚敢意恩纶之误更纒郡绂之荣揣涯分以曷胜仰生成之有自兹盖恭遇皇太子殿下稟资玉裕毓粹渊冲焕辉润以照人体温文而接物有如庸妄亦荷眷私某敢不奋励厥心恪勤所事磨铅策蹇虽自叹於拙艰济剧拨烦愿少图於报効

卷五

钦定四库全书

宫教集卷五 宋 崔敦礼 撰劄子十五首

进重删定吕祖谦所编文监劄子

臣昨蒙宣引奏事令臣删定吕祖谦所编文监奏疏八册臣学术荒疎仰被圣训不敢不竭愚诚今已删定了毕其元降出本一一贴黄声说所以删去与增添却重别缮写净本八册进呈但本朝继五代之後其始文字未遽纯粹难以求备又不可无以充一代之言如国初臣僚是也至如名在当世号称直臣言虽有疑不可登载亦不可无聊以备一人之作如邹浩之类是也大率本朝自仁宗以後开广言路於是鯁言说论表表愈伟臣今於元降出本内取其缓而不切者删之别摭要而有体者增之至於一篇之内时有难於传後之辞难以小疵遂害全篇不免参校副本有所删除及其间脱错亦一一改定悉已贴黄声说臣虽罄其区区大惧智识浅短不能仰副圣意所有元降出本册谨随劄子上进仰乞睿察

代乞罢總司市易劄子

臣窃惟国家财用养兵之费居什七陛下天姿智勇规恢远图所以优恤卒伍者甚軫圣虑近以沿江诸屯军士有口累猥衆不能自贍者特降緡钱每總司二十万俾之市易以岁入之息分给之甚大惠也夫商贾之逐利不过什一今緡钱二十万回易岁责十万则是五分之息夫以县官二十万緡而资以总所之权藉以养军之说市廛列肆车运舟载凡民间有一孔之利其势可得者必笼而取之州县不敢禁关征不可呵鼠雀之蠹侵牟公家之物并缘之奸渔夺商贾之利所在場务课额率皆亏损州县往往督责又故为苛留巧取百端道途怨嗟商贾几於不行臣甚为朝廷惜之臣姑以淮西所见者计之若总司以岁所收十万之息尽行给散建康及司马两军亡虑七八万人多者所得不下二三緡少不过千钱得之者既微未足为惠而不得者宁无怨言所谓不患寡而患不均也夫结军士之心有义有利二者要并行而不废利以养其身义以服其心古人固有投醪於河俾士卒同流而饮盖欲其均及之也楚师多寒王巡而拊之三军之士皆如挟纊此以义感之也如闻今次所散贍给之金絶微以朝廷黄榜措置使此曹终岁望之而所得止此此所以不能服其心也仰惟陛下躬履节俭声色不迓货利不殖凡为帑藏之储以备军需结士心耳所愿岂与商贾细民计较区区小利哉臣愚欲望圣慈详酌罢去总司回易一事以便民旅仍乞断自宸衷出御府之金令江上诸屯之军每岁或间岁大閱一次松江兵屯有五多寡不同多者捐五六万緡俾以其半为教閱激犒之费以其半给口累之衆者如此则人人皆沾其赐虽所得不多亦且均平有以服其心也况今日楮币流行江淮之间不重见镗而重交子至有堆积见钱以买交子惟恐不得者如臣所陈陛下不过岁捐三十万交子则霈然矣岂惟名正而惠周可以振士气而数路细民商贾不至失业寔受不赀之赐也取进止

论立法制劄子

臣窃惟立国之权惟法度政令而已祖宗之法度要使天下遵之而不敢议人主之政令要使天下信之而不敢疑若夫因一事而立一法因一人而下一令则天下窃议而人心益疑矣仰惟陛下刚健出於天纵宏规远略冠古未有甚盛德也然比年以来祖宗旧法或变於小臣之献言而朝廷出令或徇於一夫之私意为之特降指挥如此等类不胜其多臣姑以到江东所见一二言之夫巡辖通铺自有司存若其稽迟行法可也今乃因有阙误特令守倅入衙夫州郡之事孰非隶守倅者可尽入衙乎此亦未免为文具也岂非因一事而立一法乎路分钤辖与转运判官提举前於茶盐官着在乾道新书所至未尝不遵守今忽特降指挥申明如此则乾道一书每事皆当降指挥然後遵守何其繁也岂非因一人而下一令乎此特其小者犹未至於害政也至於兵戎之职各有临制阶级自都总管而下又有副都总管又有路钤辖路分都监亦犹诸军之有都统制副都统制统领之属今许路钤辖因训练得专奏则诸路副都总管路分都监及诸军统制统领苟有为之地者皆当援例而降指挥矣平居无事未计利害缓急之际军政不一岂不乖乱况其间挟势妄作之人必至率意生事帅臣不敢号令监司不敢谁何紊乱常制莫甚於此此令一下輿议譴然知必有谓良由结交植党苟相崇重欺罔圣聪变乱法制充其类而长之将何所不至外议以为权要近习有主其人者臣在远方不得而知但观近数年凡权要近习所主之人所立之事号令一出无敢执违论駁者而士大夫顾望如此岂不负国昔赵充国有言吾年老矣不以余命为国家言之谁当言者况臣蒙恩最厚非充国比年将七十方欲乞骸以归若隐默不言徒与天下窃议寔负陛下伏望断自宸衷自今以往凡小臣献说必察其所由来详之慎之毋轻立法凡朝廷出令必合天下之公心毋徇一夫之私意俾天下咸知王言之大王心之一则绥先王之祿底蒸民之心端自此也臣无任惓惓

奏论教化劄子

臣闻民俗之厚薄关於天下之治乱尧舜之民比屋皆可封也所以为治朝桀纣之民比屋皆可诛也所以为乱世自昔圣帝明王所以移风易俗以寿天下之脉知夫不可以法防而禁止於是一以教化为先暨秦汉以来风俗益弊而时君世主不务崇尚教化方区区於法禁之间法愈繁而奸愈生禁愈密而诈愈出是以董仲舒王吉之徒始推原所自而以教化不修为言窃观文帝之世一以君子长者之道待天下镇之以渊默示之以淳朴用能海内富庶兴於礼义断狱数百几致刑措教化之效讎不已然乎臣仰惟陛下勤俭之德仁孝之资尚忠厚以迪民彝崇朴素以先天下是以四海之民观感而化悉趋於善然而比年以来民俗日薄闾阎之内田野之间习嚣鬪顽庸之态扇乖争陵犯之风以疾视为常情以雠杀为美事及其极弊至于灭人情絶天理不可胜言汉魏相所谓今年子弟杀父兄妻杀夫以为非小变者此之谓也而士大夫循习为常恬不为怪盖病在腹心发见於外已非美证而顾以为缓岂不戾欤虽然近民之官无如郡守上之所使以承流宣化风俗不善宜责於此臣伏望睿慈发德音下明诏俾四方长吏颇以教化为务乡射食飧之礼可举者举之孝友睦婣之俗可旌者旌之要不专於法禁而务以移风易俗使民回心而鄉道兹至治之本也且昔之为郡其民有为不善则闭合自责今使陛下之长吏人人各以风俗为任则陛下之民其有不归於善者乎惟圣意留神幸甚

代陈丞相乞住罢白劄施行事劄子

臣待罪帅藩职事之外年老识昏每恨无以仰裨圣德敢因近事辄劾愚忠窃闻号令出於人主行於朝廷布於中外古今天下之所同也间有军国机密之事或虑行遣稽缓则自御前批降指挥用宝行下此所以令天下信而不容伪也未闻有内臣或都承旨司数百里外以白劄传旨处分事者臣自到任以来一年又半矣凡三次被受指挥皆是白劄其一发北来人王济等送都统司支破请受其一催勘杨百宁侵用官纲其一今次天申节断屠事臣各已遵依施行矣此三事者非甚机密之事若付省部行下何所不可夫省部行移则有印御前批降则有宝其文书可验其经由可考天下无得而疑者舍此而用白劄虽是小事无甚利害臣之愚虑窃虑白劄既信於天下则他时缓急有支降钱物调发军马处置边徼干国家大利害等事既是地远其势不得覆奏又所取遵依状止令付差来人回或申元承受去处其间诈伪岂可尽防若严重知体之人必至奏审则往来之间遂失事机若缪懦无识之人耳目习熟以为当然即便施行岂不误事又文字或不附通差使臣虞候賫送所至妄自张皇颇有惊动官吏奉之如奉勅使犒劳仆马馈遗酒食之费有至二三百千者州郡如此其他可知兼又访闻诸军将佐或总领诸司及两淮州郡时时有之如此实於朝廷事体非便亦有外方施行之事而朝廷不预知者万一诈伪决至误事悔无所及大率奸民巧诈如度牒交子茶盐钞引之类犹能伪为况此白批幅纸岂难撰造使其奸细容心於其间当不止脱漏馈遗而已也臣愚欲望圣慈自今以後在外有合处分之事乞从御前批降或从省部行下庶几号令信确人不致疑而于事体甚正异时缓急不至误事天下幸甚

代江东帅臣亢旱乞米赈糶劄子

臣等近以江东一路亢旱依準七月二十五日御笔指挥预讲救荒之政臣等商量别无长策惟州县镇市乡村之间有米可籴则饥民不至流移已措置那簇钱会分头差官於得熟州军收籴尚虑道路遥远米到迟缓及多寡有无殊未可必遂於前月二十一日具奏仰干圣造乞於桩积见在米内兑借米三十万石穀二十万石应副分散诸州县赈糶今月三日准尚书省劄子奉圣旨候见灾伤人户实数别具闻奏臣等有以见陛下軫念饥民俯赐允从之意然尚有愚见须至再冒宸聪窃缘江东九郡其间只太平一州圩田颇熟信州或望半收其余皆已申到或云损及七分或云损及九分以上臣等体访诸州相乘除大约通一路损及六分以上其间州郡亦已有申称缘旱禾无收民间见今阙食乞行赈糶者今若候诸州差官检到实损分数攢造支账须是十一月初间才得圆备自此申奏待报及得报之後方敢斟酌多少轻重以分拨数目又取会诸司有米所在通融兑便以省般运之费或有地里僻远及水路不通去处未免差雇舟船车脚往返之间动是一两月即见冬深民多流移救之无及臣等窃见目今人情皇皇若速得回降指挥虽未及分拨即先次散给小榜具宣陛下忧恤饥荒借兑米穀之意俾民间晓然知所感戴圣恩免起流离之念兼桩积之米间有乾道二年收籴者经隔十余年亦恐愈益陈腐不乘此时以陈易新则无时而可伏望圣慈详酌检会臣等前奏早赐处分施行不胜至幸

代江东诸司论淮东不当和籴劄子

臣等近者传闻朝廷已降指挥令淮东总领所支降钱银於淮东路和籴十万硕桩管者臣等窃谓今岁旱伤甚广幸而旁近一二州军得熟邻郡有可告籴客旅有可兴贩以臣等所闻淮东一路惟扬楚间颇熟然亦出米无几今若朝廷和籴十万此声一出则一路闭籴价必腾踊非唯邻郡无告籴之所而客贩阻遏饥民愈见费力且如建康见分头亦於彼处收籴及招邀客贩以济目前既闻有和籴指挥人皆疑惑其他州郡亦可想见且常平仓古今称为良法者盖缘米贱则收籴米贵则出粜及价平乃止凡以为民耳今岁亢旱如此粒食既艰臣等方望朝廷出粜积米以平市直而更下和籴之令亦恐有传闻不实以淮东大熟奏闻者伏望圣慈详酌如已降指挥即乞且与权住候来年秋成收籴未为晚也臣等狂愚抵突天威惶惧之至

代论私盐妄通平人之弊劄子

臣窃惟私盐之禁在於絶私贩今州县鞠盐囚必使多通买盐之家私贩仅获数人而买盐被系者往往倍之狱吏得之以奇货且平时买盐者囚既尝享其利矣决不肯供通所通皆鬻而不售者耳信而追之适足为私贩之助臣已一面约束外欲望朝廷指挥行下州县应勘鞠盐囚不得妄以买盐为名追逮平人若情理切害有碍结狱者在县则申州在州则申监司方许追证庶使无辜之民不致枉被禁系

代论大囚到官先供大情然後送狱劄子

窃照乾道四年指挥应录大辟先附囚口责状一通覆视狱案果无差殊然後宣读所以深革造次轻忽之弊然今复有可议者夫愚民吐辞初无条绪今供责之款粲然可读而皆合於法者狱吏修飭为之也鍛链既久囚耳聆其状而心记之熟矣若曰未尝为盗而诬以为盗此愚民所得辨款辞之间不能惑也惟均於杀人而杀人之情可以生可以死均於为盗而为盗之情可以重可以轻责於款者有毫厘之分则定其罪者有天渊之殊囚既不解法意惟习於款辞之熟一时附口责状安知其曲折而尽变其款哉窃谓款之大情宜察其初方其捕至公庭未属於吏其情最不可忽欲望朝廷特降指挥凡初捕凶盗委自长吏屏息捕人点差无干碍吏人当厅责供大状然後送狱狱成傥与元责状异同则别委无干碍官吏究其所以异同之因如是则吏不容奸刑不濫及足以仰副哀矜庶狱之意

代平江守臣乞截拨牙契钱修城劄子

臣闻州郡之有城壁如家居之藩篱也人之一家而藩篱葺治则室庐严谧居处者得其所安苟为不然颓圯断阙行道之人皆得以迕则不特起盗窃之萌而气象萧条甚非有家之盛观臣窃见平江当四達之冲井邑广袤民物繁夥为两浙剧郡一岁之间使命往来凡四经过而城壁不治乃视他郡尤甚臣自到任以来周视四围多因积雨霖沥岁久不葺遂致摧毁颓墙败堞非惟盗贼私贩夤夜度越无以限制而敌使观瞻之际甚非所以张国威壮形势也臣检准绍兴六年三月一日指挥逐州城壁若倒塌稍多所用工力浩烦审度实用申尚书省又检准隆兴二年十二月五日勅节文应内地州郡城寨合行修葺者听守令量力措置臣误膺委寄假守辅藩目覩城壁废坏如此岂敢惮烦避事苟安岁月不任其责今差官检计得修城之

夫约用若干工其所支费约用钱若干米若干窃缘本府财力窘匮用度至广会其所入犹不足以供常费寻刷根行得惟有牙契税钱一项虽增亏不常以中数计岁收钱约有若干可以拘收应副修城使用方欲开具因依申奏朝廷乞行支拨间準今月二十一日指挥令提举司拘收前件牙契税钱拨隶制司充上供解发臣既见城壁废坏不能自己取之于官既无所出募之於民又值去年水旱之後民力殫残无以供应故敢不避斧钺之诛冒犯天威欲望陛下详览臣所论修城利害特出圣断许令本府将今年所收全年牙契税钱免充上供解发专一应副修城使用俾臣得以究心竭力缮治城壁屹然为当道壮观内以为奸民之防外以彰形胜之威臣不胜大愿惟陛下裁择

免迁移城下坟塚劄子

准县牒备准使帖委敦礼告示迁移坟塚事窃见城脚坟塚亦有民间旧来祖坟累经修城未尝迁动盖不妨补砌城壁今若尽令发掘深恐未便今来相度除暴露遗骸疾速召人收瘞外所有坟塚欲各钉六七尺木桩上书坟塚二字以为标帜其间有主坟塚即告示各家自行看覷无主坟塚即责令地分人照顾仍乞自使府行下监修官责令部役人不得於有坟塚处取土作践及乞出榜立赏许令告首欲望钧旨一例行下两县施行

代论起发官物雇舟之数劄子

臣窃见所至州县凡遇起发官物和雇舟船百姓惊惧如遭驱掳呻吟怨呼之声所不忍闻道路不通商旅断絶此伤和气之大也臣尝询之其说不过有二曰官雇之直太薄曰留滞之日太久官雇薄则典剥衾裯以为赔备之资留滞久则侵耗官物有拘没舟船之患此百姓所以不肯就雇者也欲望朝廷量增地里水脚之直应有装发米钱且就所起数内尅支如米穀之属则照时值折变支給仍严立减尅之禁先支其值而後装发所有卸纳去处亦立为条限如限内交卸不了许人越诉庶几民情不至嗟怨为利甚大

又代论纳税不销之弊劄子

臣窃惟有产则有税自古然也今州县之间每遇追催则叹息愁恨盈于田里者无他焉盖赋税已纳而官扰之不已也夫已纳而被扰勾稽不明之过耳且输纳赋税有户钞给之纳户有县钞付之勾稽今则不然县钞之与簿书徒为文具钞之下县者十无五六而簿书经年无勾稽之迹及至剗催则曰欠曰足惟案胥之手追者未必欠欠者未必追设有已纳被追执户钞而去则钞留于案身拘于门其脱身请钞之费不啻于倍纳民安得而不怨哉况主簿自有勾稽欲望朝廷申严行下如遇纳税其主簿随受纳官辰入酉出税才纳过随即勾销若县道剗催即移文主簿取见欠不得只凭案吏便行追催若有已纳被追之人许执户钞越诉依条施行

代论过界盗贼劄子

臣访闻楚州淮阴县五月初六日夜有淮北清河口刼贼一百余人过界前来本县杀人放火刼夺财物及刼去县狱罪人一名并官军弓弩器仗又伤损县尉驱掳知县侯立中前去却至初九日放回臣颇闻沿淮对境比年以来排铺甚密今有盗贼百余人过界安得不知盖缘淮南跳河之徒多往北界盗马惊扰及至盗贼前来作过是致北界亦不禁止仰惟陛下圣谟神算方此养威持重以图远略止因沿边州军不体朝廷大计屑屑细故隐匿事端今来盗贼作过至於杀掠军民驱掳官吏窃恐边臣未必以实上闻欲望圣慈令两淮帅臣及统兵官同共相度纵不可依彼排铺即乞於沿淮诸县如淮阴之类荒陋去处量增戍兵以防盗贼若置而不问窃恐他日有甚於此重劳朝廷处置取进止代陈丞相论淮岸跳河及彼界来归人劄子

臣待罪建康密迹两淮偶有见闻须至奏知臣窃闻近日淮上跳河之人多往北界盗马今年正月十五日及二月十六日北界尝两遣人兵至安丰军对境争鬪濒淮居民亦有奔走逃遁数日而後定者又臣近日颇见枢密院劄下淮西总领司备据光州申解到归正人王椿奉圣旨令淮西安抚司密切差人伴送至建康府御前军收管支破请受如此者不一朝廷招纳归正人以系中原心固为甚善如臣之愚实有过虑臣窃见乾道四五年间敌取归正人朝廷不得已发遣被遣之人号哭呼天大出怨言怒骂而去又闻隆兴二年敌骑过淮以取归正为词江上汹汹日惧反侧之变幸敌即引去遂以安帖仰惟陛下厉精尝胆规恢远略神谟庙算固有定论异时兵威一振边境肃清则凡厥庶民悉归版籍顾此屑屑一二未甚有益於事今来沿边州军不知朝廷大体时时有所接纳窃恐影带奸细为国生事万一敌人或指名取索决至纷拏臣又闻近有饶州百姓马狗儿者因过彼界为逻者所获申到敌廷乃不杀不留却牒盱眙军发还其意可见恐必为他日取人张本欲望圣慈戒敕沿边守臣重立赏格严行禁戢跳河盗马之人及有彼界来归者只一面令说谕遣回不许接纳免起争端以贻後悔

卷六

钦定四库全书

宫教集卷六 宋 崔敦礼 撰记六首

平江府教授厅壁记

乡里必有学学必有师儒古之制也周之党庠术序之法行仕焉而归老则教於其乡大夫为士师士为少师由汉至唐州郡兴学文学博士之员列於僚佐国朝庆历间天子开天章阁与大臣论治所先务慨然诏天下皆得立学於是设教之职有可充选者部使者郡守许以名闻熙宁以来简置悉由於朝清其选号为外道馆阁姑苏大郡先自范文正公出守割南园之地以创学宫继以前辈名儒相承讲道文风之盛济济乎洋洋乎为江浙冠吁其盛哉余掌学之明年诸生合辞以请曰学旧无题名前人名氏将湮没不传今稽之图籍自乐圃先生朱伯原而上所可见者五人又访之耆老自林元孚而下继之三十有五人虽官资岁月不能尽省而先後之次皆可考识愿刻诸石以图永久余曰子可谓知本矣仕於郡者分职而治夜漏未尽已起纓弁束衽诣长官白事退则困吏牒埋没不得出气其所可否关民休戚甚则系人之生死教官抱尘编对青衿空谈其间课程无补於簿书弦歌不应於期会真若缓不急者而天下之治乱风俗之厚薄其原盖出乎此诸儒教导余不得优劣独考其次安定先生翼之实首居其任先生所至务以体用之学训学者东南之士出其门无虑二千人其徒刘执中奏事熙宁间谓今学者明夫圣人体用以为政教之本皆由师之力今门人在朝若钱藻之渊笃孙觉之纯明范纯仁之直温钱公辅之简谅在外明体适用以教於民逮数十辈其余政事文学出於时不可胜数当是之时天下无事内之风化醇百姓安外之威灵宣四夷服治道运行诸产得宜恩肥土渥远近咸抚固曰上之德亦一时人材出於先生之门者与有力也余生乎後时不获亲而炙之幸与二三子搜次名氏因书其事以示後之人庶乎为典教之丕式且亦知教事之为重云乾道壬辰冬至日记

高邮主簿厅壁记

凡人有尺寸才皆欲随短长自见处非其所类墨墨不得意若事适当尔欲开空造有出意见作可喜事则拘碍尺度动辄出位高邮淮东壮邑也邑无丞簿实赞令事鈎考外若监事若常平向总於丞号剧烦者簿悉主办绍兴辛巳郡其邑凡郡之体略备丞事悉分於诸曹簿所掌唯鈎稽在余初到官适逢朝廷布旷大之泽诏省簿事图籍皆度阁不复用则所谓簿者乃无毫髮以见清晨谒上官不交一言而退庭内闲闲日影布地时有二三子抱书在门门外弥望菜畦晚色葱翠闻灌溉声亦有老农圃时辑杖来谈田间占候事饭余细履好风吹衣且不知身之有我也况为簪笏累乎厅旧无记问之老吏得前任名氏若干人书於壁

代严子文滁州奠枕楼记

乾道元年疆陲罢兵烽火撤警边民父子收卷戈甲归服田垄天子轸念两淮休养涵育俾各安宇二千石能宣主德属之民则居者以寧流者以还否则境内萧条民戚戚不奠厥居八年某月滁人阙守诏用右宣教郎辛侯幼安至之日周视郭郭荡然成墟其民编茅籍苇侨寄於瓦砾之场庐宿不修行者露盖市无鷄豚晨夕之须无得侯慨然作曰是可已也耶自兵休迄今江以北所在寧辑鷄鸣犬吠邑屋相接而独滁若是守土者过也余何辞於是早夜以思求所以为安集之计郡之酤肆旧颓废不治市区寂然人无以为乐侯乃易而新之曰凡邸馆所以召和气作民之欢心也非直曰程课入云尔即馆之傍筑逆旅之邸宿息屏蔽罔不毕备纳车聚各有其所四方之至者不求皆予之以归自是流逋四来商旅毕集人情愉愉上下绥泰乐生兴事民用富庶既又揭楼於邸之上名之曰奠枕使其民登临而歌舞之面城邑之清明俯闾閭之繁夥荒陋之气一洗而空矣楼成而落之侯举酒楼上属父老而告曰今日之居安乎壮者擐甲胄弱者供转输急呼疾步势若星火时则思太平无事之为安水旱相仍秉耒耜者一墾不得起余甚贵衾裯不易斗粟时则思丰年乐岁之为安惊惧盗贼困逼於饥馑荡析尔土六亲不得相保时则思按堵乐业之为安今疆事清理年穀顺成连薨比屋之民各复其业吾与父老登楼以娱乐东望瓦梁清流关山川增气郁乎葱葱前瞻丰山玩林壑之美想醉翁之遗风岂不休哉侯喜其政之成移书二千里乞余文以为记余曰是不可不书也故为之书侯有文武材伟人也尝官朝名弃疾幼安其字云

地藏经文变相图记

敦礼世居通州自少时侍家君读书问诗礼外无他及常言我先祖慈祥仁厚出於天性賑贫恤孤惟恐不及护物生命如护头目视物之伤如其所爱故通人称之不以姓以字而曰放生先祖盖尝谓佛菩萨中誓愿宏阔莫大於地藏显见果报使人知戒惧修省莫详於是经绍圣间乃以菩萨相及经文求诸变相命工绘画指授规模精思讲究数年而有成既成刻之佳木作文以纪其实於是菩萨救护衆生种种果报揭之图像一目而尽观相生善无有蔽惑靖康以来其板不存而所施本复不可得至今中夜以兴梦寐追想常恐斯世之不获见敦礼闻家君斯言未尝不为深叹而流涕也隆兴改元之冬里人陈姓显名者袖出是画且欲独出己力镂板而鼎新之家君展閱披玩再拜感泣曰此祖遗迹也散施四方几数万本自失其板迨今几四十年广求博访竟不得不图今日获与诸孙罗拜瞻礼视其下之文皆腐烂漫灭不可辨命敦礼志之敦礼俯伏敬谢不敢曰我先祖得古佛心法而於佛书无所不读读无不得旨归多所着述皆极至当敦礼愚无知不足窥测万一安敢补其亡家君曰因前人之志以成其美而久其传善事也其又何辞不获已乃追述而为之言曰尔时世尊居忉利天於大圓滿光明等云中於檀波罗蜜微妙等音中广说地藏菩萨摩訶萨功德不可思议尝立大愿欲使罪苦衆生尽成佛境我然後成正觉惟是菩萨威神誓愿比诸菩萨最为广大世之不知佛者乃以方袍圆顶作菩萨像列之神祠庙庑间及於歌呗有阎王殿临地狱门之句遂使世人生狎劣想我先祖因得向往所画入菩萨本地藏菩萨实与宝衣天冠之数复取其经文章分句析而作是相凡处世间若贵若贱若愚若智若长若幼若大若小觀此变相悟诸报於见在世及未来世尘缘妄想永断诸恶及事理障不以口腹屠戮物命不生贪嗔而肆欺忍并诸罪业皆悉断灭及为一切而作方便应观是像作如是观

建康府溧阳县报恩寺度僧田记

建康府溧阳县报恩寺萧梁天监中所作也初在县之西北五十里元佑间改筑於东门外今其址也乾道三年余始卜居是邑见于寺者惟颓檐腐栋蛇鼠穿穴如逃人家单鉢不陈像设彫剥过者动心焉五年衆请蜀道渊住持渊素为一方信向至是慨然以兴作为己任勤身苦志不避寒暑尽力于治寺门廊殿经像楼阁斋庖库庾严饰略具钟呗日闻粥鱼斋鼓之声不絶一日渊与其徒谋曰吾支倾补坏粗成禅席今将时葺而岁增之庄严殊胜作大道場则岂吾力所可独任亦赖方来之士心同力全臂股相用乃克有济而寺素空寥无以度人四方之游者泛然惟传舍之视苟不为之计寺之兴废未可知也乃饬其徒慧如者循诸方例募置常产为度僧局铢积寸累得膏腴之田若干亩凡志于学利于衆劳於寺事则以岁之入度之设为科条至精且密於是人劝其功堕者思进儒者思奋欢喜踊跃而作佛事渊犹惧其无以示後之人也乞余为之记吁佛教之盛於世非特曰死生祸福之说足以儆动人也盖为之徒者类能维持其法深计而善殖之是以至於愈久而不泯也吾儒之道根於人心被之天下若饥食渴饮不可以一日废学吾学者解褐而仕仕则以道德为迂阔以诗书为陈腐无有能长虑远图为名教地者相薰以此虽有贤者作岂易得志于其间哉余观渊之用心而有感于吾道也故为之书淳熙三年十一月二十五日静海崔敦礼记

海虞山宝严寺田记

常熟县之北有海虞山而西有道場曰宝严寺寺有教院荒陋不足安衆又无神灵降依为之惊动祸福以来四方之供单鉢不陈像设无飧余每过之虽怜而力不至也一日主僧德章来谒曰吾院有可兴之理邑人刘姓康名者自言其父尝以报慈宝严及吾院俱贫不能给欲施田以办百斛为三寺助粥饭缘生前愿力胜追修百倍是不可坠乃舍之如其数而三分焉今梵宫相望粥鱼斋鼓氤氲隐隐振响山谷间刘氏与有力也吾将自是庄严积累兴无尽供愿求一言记之以劝来者余曰近世多田家连亘阡陌至不可亩计扬珠捣玉露积而不收及其较封洫辨疆畛争尺寸如争死利害刘氏除慳舍有割膏肥之地而作佛事如执左券乐然付之略无难色是可取也矣故为之言康孝而乐善其父讳仲荣

序八首

送郑与之赴召序

乾道改元三月句容尉郑君与之以封事献诸朝越日有诏徵郑君赴阙下古之刚介鯁亮之士得位於朝立玉陛方寸地明目张胆指朝政阙失言当乎古论事拂乎当途抗天触神忤雷惊霆听之可福於民利於国否则放弃窜斥寄一死於千万里外与之江左一尉官至卑且甚踈远而一旦披腹心呈琅玕剑锋差然累万余言书纸数十幅寄牋西风朝奏而暮召虽古之士遭际有不能及吁亦荣矣将行告辞于同寮江寧尉崔敦礼酌而别执醴而言曰与之敢言高论旁若无人真能破羣议骇动时听今其行若登僊世俗荣之执政乐之富贵爵禄夫何忧又祝之曰与之以儒术致身推所学足以成厥功无谗随无去其本善为吾儒主盟与之喜曰

非子其谁为我言言竟遂书以为序

送汪参政赴召序

乾道改元宰相既虚席天子若曰皇天畀付予有家辅赞弥缝繫相臣是资曷可不择择必遴选日久言臣合辞曰是冢宰实百辟长不可以久旷蹕而陈词得请天子曰不然朕志自定固有待退毋庸辞乃越月有诏参政汪公赴阙下公辞不可遂行江寧尉崔敦礼职徼巡礼出送境外束带执笏立道左修属吏敬将进敛板而前曰参政硕大高明全德备道行方事实为今世推仰迺者起山林长东方诸侯天下士若民无大小无衆寡无不愿用以相今其行坐庙堂握钧轴何疑虽然上选付既重则委任必隆天下属望既切则责贤必备方今外难虽寧内治未振人材散逸收拾爱护之意未周政令迫趣中和乐易之化未全戎备懈弛长顾远虑之图未究士俗浇薄镇浮起懦之风未畅凡天下翘首想望未得者属在参政参政其必有处此记曰惟天下至诚为能经纶天下之大经立天下之大本又曰至诚无息不息则久参政念之哉

平江同官小録序

宦游之途广交际之情泛风俗之大患也古之时诸侯裂土而封士之仕者各于其国不在西封在东境世其职因以为姓氏官曹之所联接朝夕之所同事非其宗族则其父兄之执非少长之父则其里巷之亲戚後世九州四海相易而仕平时风马牛邈不相及怀章随牒丛萃而羣处秩既满又飘然而去君南我北了不闻在否世系不省爵里不传十年之後升沉反覆卑者走尘土高者上霄汉情隔势絶相忘若不相识吁岂理哉姑苏大府当四达之衢戎冠来仕者骈倚而叠足长洲令沈君喜僚案之多贤念交游之易散编次名氏联成大帙俾余题其首呜呼此足以振颓俗矣今人道途相邂逅解车卸马相劳苦一语惬意问姓氏退而书之以示不忘同官之好前辈敦厚风俗讲之为至其谊重其契及于子孙今乃略不记其本末则薄矣余既嘉沈君之意而乐名教之有助也於是乎书

韦苏州集序

韦苏州诗集十卷并续添七篇大丞相观文魏公守平江命教官所校也自大雅微阙作诗者并驱争驰其才思风韵固不可一槩惟自优游平易中来天理浑融若无意於诗者此体最为高絶韦苏州以诗鸣唐其辞清深闲远自成一家至歌行益高古近风雅非天趣雅澹稟赋自然者不能作至今观其逢杨开府诗云朝持擣菹局莫窃东隣姬一字都不识饮酒肆顽痴武皇升僊去憔悴被人欺读书事已晚把笔学题诗乃少年豪纵之人耳按苏州在广德中已为洛阳丞去武皇升仙才岁余当时作诗尤称絶唱岂初识字把笔学为者又广德中洛阳作云生长太平日不知太平欢野居云结髮累辞秩则其少年在太平时本自恬静至作汉武帝诗力诋神仙畋游之事又似在天宝间讥讽时政者岂苏州心知天宝之时乱欲去不能尝为是秘迹自晦之计与不然亦自序之过也方苏州在时其诗未甚贵重後三十余年白乐天始爱之东坡先生亦云乐天长短三千首却爱韦郎五字诗坡岂薄苏州者以乐天之文之华丽宜於无不爱也大凡浮靡之词易说平淡之音难听理固然耳今丞相观文公贵本尚古嗜好与

衆絕殊顧於此耽玩所甚好不少置其職斯文者曷敢不敬以承詩之本不一以葛繁本正參以諸本是正凡三百處而羸又得九日一詩附於卷末若蘇州之名氏與仕與年則有姚君令威之所書在云

送沈定海序

有地百里有民與社而立之令天子之官自宰相至於郡刺史事闊而慮不專不專故情有不能親勢有不能及者令得行之獎一善一境之人勸懲一惡一境之人懼士而為令足以行志矣而今之人多避而不為嚴其法使初改秩者必為令限以陞擢之格非嘗歷令不得選其治理效不以次用至矣而幸免者猶以為喜非不欲為也有所沮也有賢令焉大吏仁且明足以知之則供蜚絲菽粟奉常入外從容無事勉民以孝悌之義勵民以忠信之行職也苟不遇焉搜抉剗摘舉逋籍按條目而責之令視令為一逋戶繩以峻法督以健吏惟恐不嚴且急令不得已橫征悉索敲撈以奉期約朝夕困吏牒不得出氣論教化談忠厚則溺其職矣沈君子麟懷定海之綬將行告於鄉閭敦禮與之別而為之辭曰定海今劇邑其地岸海其民勁質易以德義服子麟清純雅亮文麗而學深有君子之風其容粹然其氣溫然足以使其民回心而向道為賢令信其無疑今有行猶懼大吏之不遇而為令之賢者沮也於是為言

送張德昭歸通州序

余宦游江南遂家金澗之陽泉甘而土肥掘云采月偃蹇江湖間足以自樂地僻左與淮風馬牛鄉里人迹所不到首丘懷土郁不能釋夜半有客剝啄扣門攬衣起聽覺非吳越音啟戶而入之海門張德昭也德昭於余有伯仲行至親且甚厚去故鄉見似人猶不可得德昭茫然而來顰面蹇足千里而訪我喜可勝言挽須握手掀脰劇譚訪親舊之在亡問里巷之盛衰不知身之去澄江之上狼山之旁也兄其歸矣無以為兄祝為我謝鄉里崔仲由年三十五無顯名厚實於時今且為耕田夫苟得歸里固將有藉以見長老可教我者願寄東風

送嚴江陰守序

有地千里分土于社而為之守天子之官自宰相至于郡刺史事闊而慮不專情有不能親勢有不能及者守得為之古之人下車見百年之老問風俗之所宜與其民疾苦出于郊視五穀美惡然後為條教勸民為善置師帥伍長班行之後世為吏者以功利為急入其境蜚絲丰乎金布溢乎論教化談忠厚則溺其職矣江陰新使君嚴公家吳台之旁朝夕坐一室左右圖史論辨古今事當否搜奇抉怪日哦其間一朝戒行李束書策懷其綬而行人以公之簡古而屈于郡為惜也而不知其所樂焉今人坐黃堂閱吏牒對鴈鷺行較銖寸升斗豈其所欲哉勢驅之也在上者用不贍按虛籍而責之郡曰供我償我地要則事丛州大則責繁江陰居浙之西偏岸江而地狹賦入之上于大農者少公時舉按簿籍仅仅不余咏中和之詩作清靜之歌歡樂子弟安燕長老使道院之人聞義而不聞利此古循吏之化也可以世俗語哉於其行蘇之人士各賦詩以識別而屬敦禮為之序

送秦倅序

乐於近宦而憚於远吏世俗之常情也古者为吏长子孙其习久因以为姓氏故服其官惟其长子孙而守室庐扫坟墓终其身无征行之劳後世东西南北之人相易为仕怀章就戍交午於道路於是有飘零之艰有违离之思有山行水宿崎岖险阻跋履之勤有风霜冰雪寒暑雨露凌冒之虞有土风气俗语言嗜欲不能相安相通之患士大夫裹章服受一阙於朝较长量短必便且近是择得则喜否则戚戚以为忧吁今古事不同其类皆然男子之生桑弧蓬矢有四方之志何至牵於世俗拏拘局束如是哉秦君羣用家金瀨之阳一朝戒行李告朋友将貳政於泸溪泸溪距此三千里风马牛不相及人以羣用之贤而吏於远为惜也而不知其有乐焉今人闲居里巷相慕悦庆吊称问相徵逐可矣而杖屨之所游不在西封在东境四方山川之奇岩谷之秀烟云泉石鱼龙草木之变可喜可愕可惊可惧曾不得洞心骇目宏意气助为波澜羣用将泝大江上康庐过赤壁山览周郎之遗踪南登岳阳济洞庭观怒涛之轩轰羣崖之喷泄溢九州而吞七泽南望衡湘北望江陵山徘徊壶头问沅江之源访酉阳之逸曲固将览天下之胜絶大肆於言辞其乐岂易量哉可教我者愿寄西风

<集部,别集类,南宋建炎至德佑,宫教集>

卷七

钦定四库全书

宫教集卷七 宋 崔敦礼 撰论五首

易论

易者卜筮之书乎曰非也圣人惧天下之人蔽於卜筮之学而为之也以易为卜筮者假易以为怪者也曰周官之筮人太卜皆言掌三易何也曰周官非周公之书战国陰谋之书也唐虞之典谟箕子之九畴三代之诰誓皆言卜筮未尝假易以为怪也此有以见周官非吾圣人之书也曰夫子赞易或以卜筮以蓍龟为言者何也曰原圣人作易之本也古者易之初兴何为兴也以卜筮而兴也卜筮之兴何为而兴也天以此与圣人也天不与天下而与圣人者何也曰天之与圣人将与天下共之也天生灵蓍与草木等尔乌知其可筮也惟圣人则用之以四十有九而天下之数无遗算天生灵龟与鳞介等尔乌知其可卜也圣人则灼之以七十二鑽而天下之象无余蘊天下之象数举尽於蓍龟则吉凶祸福之几藏於兆朕人之智识思虑所不能到者举可得而知之也此圣人意也亦天意也然圣人忧天下深虑後世远惧天下之民蔽於卜筮之说朝灼龟暮揲蓍规规然惟枯茎朽骨之求而不知修德以致福为善以避祸也於是不得已取蓍龟而则之以为易易之有象以龟之象而定之也易之有数以蓍之数而揲之也蓍龟之象数既寓於易圣人於是因其象数之所寓而系之以辞如是而为君子如是而为小人如是而可以趋吉如是而可以避凶事有可以行则告之以征凶征吉之辞事有不必行则告之以征吝利贞之辞翦翦斩斩如?曲直不可移易是蓍龟之灵而先知者圣人以取而寓於易所谓蓍龟者已为刍狗已为筌蹄矣人能玩其占於方册之上动静取舍惟易之听圣人以为吉从而趋之圣人以为凶从而避之是亦蓍龟之最灵者也不然揲蓍以为筮而求其数之衍耗灼龟以为卜而观其兆之陰阳如是而验其吉凶而於圣人之易无或拟议焉可也圣人既取蓍龟以作易後世不当以易而听於蓍龟也後世不得已而以蓍龟占事可也不当假易以为怪也观国之光利用宾於王圣人释观之六四人臣进而得君之辞也而周史筮之以为有土之兆困於石据於蒺藜圣人因困之六三居非其所自取危辱之辞也而武子筮之以为淫乱之占公用享於天子圣人择大有之九三以大臣而膺君宠之辞也晋侯筮之以为战则克之祥斯皆假易之辞委曲迁就而信其说者也至於卦爻之辞有不委曲而迁就则又自为一说以饰其意毕万筮仕於晋遇屯之比曰合而能固安而能杀公侯之卦也圣人屯比之辞有是乎成季之将生也筮遇大有之乾曰同复於父敬如君所大有乾之辞有是乎卦爻之义果如是则圣人必言之於辞圣人不言之而自为是说以强合其事不可也圣人有其辞又委曲迁就之不可也斯皆假易以为怪者也故曰圣人既取蓍龟以作易後世不当以易而听於蓍龟也後世不得已而以蓍龟占事可也不当假易以为怪也

诗论

古诗三千篇仲尼删之存者三百後世儒者从而和之曰仲尼删诗善者全而用不善者全而

去非如春秋诸经或因或革相错而成也余谓圣人之於诗非特删之盖尝修之修之云者如修春秋之法一言一字必致其谨而未尝轻也谓仲尼删诗而不言修诗者不知圣人作经之法者也轻吾诗者也六经之文载在方册巍巍煌煌如天地之大日月之明河汉之浑浩山岳之峻峙雷霆风雨之变化天下後世不敢以拟议也天下後世不敢以拟议者以其为圣人作也然而易之书成於三圣春秋作於仲尼礼乐周公之制仲尼从而定之天下後世不敢以拟议固也书之五十八篇不出於尧舜禹之典谟则出商周训诰誓命之文不出於臯夔稷契賡歌吁咈之言则出於伊尹传说周公召公之徒进戒纳海之作天下後世亦不敢拟议固也至於诗所存三百篇是三百篇者上而王廷之公卿次而诸侯之大夫微而奔走之小臣岩谷之逸士下而至放逐之羈臣伶伦之贱伎又其下至於輿台皁隶闾阎匹夫与夫妇人女子闺门房闼之陋其情动於中而形於声因之而成诗是於述作之端初未为严且密也而天下後世亦不敢拟议焉非惟不敢虽欲拟议不可得也自秦燔书诗亡者数篇後世高才絕学之士因其意而补之类皆羞澁暧昧不能得其万一吁诗之为诗出於当时王廷之公卿者不可及也而诸侯大夫之诗岂不能及之出於王公大人者不可及也而奔走小臣岩谷逸士羈臣贱伎之诗後世岂不能及之出於贤人君子者不可及也而輿台皁隶闾阎匹夫与夫妇人女子闺门房闼之诗後世岂不能及之有求其说而不得则曰民有喜怒而不能为诗皆当时贤者断之礼义而代之作此非通论也夫圣人之於诗既删之为三百篇矣而三百之中其初固不能皆合於则胥当於理而中於道也而今之诗所以当於理而中於道者圣人修之也修之之法严故天下後世无得而拟议也硕人之诗曰巧笑倩兮美目盼兮素以为绚兮古诗也素以为绚者谓绘事後於素功也子夏曰绘事後於素功礼亦可得而後乎仲尼信其说知礼之不可一日後也故特曰巧笑倩兮美目盼兮而去其素以为绚之一句则知圣人修诗立法之严审订而商榷之类皆如此是岂特曰删之为三百篇而已哉又按仲尼修诗乃在於反鲁之时而仲尼反鲁当鲁哀公十一年也春秋自哀公以前诗之篇章词句与今之诗多相戾皆仲尼修而改之也有於一篇一章而易其序者若楚子诵武之诗其卒章曰耆定尔功其三曰敷时绎思我徂惟求定其六曰绥万邦屡丰年古诗也仲尼修诗则曰敷时绎思我徂惟求定之句为赉之什而继乎讲武类禡之篇非武之三也以绥万邦屡丰年之句为讲武类禡之什而继乎酌之後非武之六也此於一篇一章而易其序也有於一句之内而变其文者子舟诵烝民之诗曰刚亦不吐柔亦不茹古诗也仲尼修诗则曰柔亦不茹刚亦不吐先柔而後刚惧其刚之太过也成鱣诵皇矣之诗曰惟此文王帝度其心莫其德音古诗也仲尼修诗则曰惟此王季帝度其心貊其德音以文王之德而归之王季尊所本也此於一句之内而变其文也有於一字之间而润饰其意者卫彪傒诵板之诗曰敬天之怒不敢戲豫敬天之渝不敢驰驱不之为辞非所以示其戒仲尼修诗则曰敬天之怒无敢戲豫敬天之渝无敢驰驱无之者示戒之意晋伯瑕诵北山之诗曰或燕燕居息或懽懽事国则有怨而自怠之意仲尼修诗则曰或燕燕居息或尽瘁事国则有匪躬服劳之心也此於一字之间而润饰其意也类而推之不可槩举则知圣人修诗如绳墨曲直毫厘不敢违如权衡轻重铢两不敢失修之之法比春秋而加严焉不如是不足以垂将来而诏後世也岂特曰删为三百篇而已哉故曰谓仲尼删诗而不言修诗者不知圣人作经之法者也轻吾诗者也知圣人修诗则三百篇之诗皆曰圣人之诗亦可也

礼论

人生不能无羣羣不能无争人之初倥傯蒙而无知後为物役而机生情动而本远雪霜风雨雷霆暴其外於是知架巢空穴挽草木取皮革饥渴牝牡之欲毆其内於是知噬禽兽咀果实是故有得失之殊途有好恶之异尚有有余不足之异致其有不得所欲则击夺随之交焉而争睽焉而鬪齿利者啮爪刚者决然後有一人焉出而治之谓天下之民之争求以止之必有以痛之斯畏焉於是加之鞭朴以笞捶其肌肤施之刀锯以残割其形体而名之曰刑然其争又大焉者力大者挐势强者轧徒衆者夺啸呼踊跃草野涂血则向之痛之者不足恃也必有以胁之斯服焉於是为之师旅什伍之法为之旌旗钟鼓之用为之干戈介冑弧矢矛戟之械为之熊罴貔貅虎之威而名之曰兵息争之小以刑息争之大以兵然人之争心无时可已也人之争心无时而可已圣人惟曰吾有兵与刑营营乎日为杀人之事可乎不可也故有微术焉就其起居动作之间创为之法委曲而节文名之曰礼人有贵贱不知贵贱之等圣人则设为朝聘位序之严车服采色之别使之有等而不敢相越人有长幼不知长幼之序圣人则立为射乡饮食之节摎相介绍之仪使之有序而不敢以相乱人有男女不知男女之别圣人则严之以媒妁之词重之以币帛之贄使之有别而不敢以相狎礼之制行於天下天下之人乃始日循循然束缚於名分之内常有所碍而不得肆其欲故其於息争也有甚於兵刑之临之焉周之衰二百余年诸侯迭霸非不盛且大然睥睨周鼎缩手不敢取方且歃血会盟以尊周室周非有兵与刑以制之也礼存焉也呜呼圣人息争之道至於礼而极矣或曰礼本於太一谓出於兵刑之後何也曰太一礼之本也从而表饰之使着於世圣人也易之有需需饮食之道争所由起也故以讼讼而不能止故以师师之与讼能比而蓄之不能有所辨故辨上下定民志终归於履而後已此圣人意也刑兵与礼之序也

乐论

古之圣人所以愚民之思虑役民之耳目者何其至也圣人爱民之心固欲其智不欲其愚固欲其安不欲其劳而必求所以愚而役之者是非圣人忍於愚民役民也天下之民至弱而强至柔而刚彼其思虑可使惟吾信而不可使之自信其思虑彼其耳目可使惟吾用而不可使之自用其耳目如是而天下皆君子则可不幸而有小人者杂乎其间则将任其思虑耳目之所及无所往而不至矣易曰鼓之舞之以尽神孟子曰杀之而不怨利之而不庸民日迁善而不知为之愚而役之之谓也乐也者真圣人愚民役民之具坎民有思虑耳目其喜怒哀乐感於中而形於外有不可强而使之也今无故而使人喜虽千金与之而容不改无故而使人怒虽白刃临之而色不变喜怒之不可强也如此而乐之所感则有可以使人喜可以使人怒者矣强而使人哀虽泣而不悲强而使人乐虽笑而不和哀乐之不可强也如此而乐之所感则有可以使人哀可以使人乐者矣故有作为发散寛大和动顺成之音则民莫不跃然而思喜作为粗厉猛起奋末广贲之音则人莫不奋然而思怒作为志微噤杀困瘁趋数之音则民莫不愀然而思哀作为嘽缓慢易繁文简节之音则民莫不泰然而思乐夫民之喜怒哀乐出於其情之自然不可强勉而乐之为乐独能使之喜则喜使之怒则怒使之哀则哀使之乐则乐如木偶在伎人之手左右动作惟机鍼之从虽有思虑耳目莫克自信自用是故有以愚而役之使然也夫乐之愚民役民一至於此窃尝求其所以可得而知乎曰不可也圣人因人心之自然审声音之所感而寓之于戚羽龠钟鼓管磬之末以为乐非有变化之妙而足以动荡人之精神非有机械之巧而足以舞蹈人之手足非有药石鍼灼之方而足以流通人之气脉方

其民之听之而喜也知其为喜而不知其喜之由非惟民不知之而所以使之喜者虽圣人亦不得而知也及其民之听之而怒也知其为怒而不知其怒之由非惟民不知之而所以使之怒者圣人亦不得而知也及其民之听之而哀听之而乐也知其为哀乐而不知其为哀乐之由非惟民不知之而所以使之哀使之乐者圣人亦不得而知也虽然彼圣人者亦欲制人之喜怒哀乐者也曰救其始也天下治乱之端善恶之理吉凶悔吝之殊皆生乎喜怒哀乐而喜怒哀乐者发於其心动於其情不可以形求不可以力致者也天下之事有可以形求而力致而刑罚得以威之号令得以语之政事得以治之至於不可形求而力致而吾无其术以愚而役之则邪僻乖乱之心得以乘间而入虽有刑政号令何所用之譬之医者之治病也病寒邪以阳药治之病热邪以陰药攻之此皆切脉观色可以形求而力致者也至夫思念志虑之微一失其正而丧心失神之患随之攻之不能助之不可虽有卢扁无以治之呜呼天下之治不先求其不可形求力致者而御之刑罚可得而威邪号令可得而语邪政事可得而治邪

文帝论

世言文帝和亲匈奴及其背约入盗令边备守不发兵深入以为文帝仁厚之至甚非通论匈奴之陵汉固也而於文帝为已甚帝屈己而优容之非仁也势也帝之治以略言之曰仁则似矣观其犯跸者有罚法也而帝必欲杀之以泄其怒盗环者有诛法也而帝必欲族之以行其威帝之於事其小者不能忍如此彼其二十三年之间遭匈奴之凭陵今年寇河南明年居北地今年入云中明年掠上郡待之愈寬而寇之愈急礼之愈下而侮之愈不已包羞忍耻如此岂其本心哉况匈奴尝杀一都尉帝即赫然震怒欲勒兵自将鼓行而前当是时非羣臣切諫於外太后固要於内则兵连祸结矣相其胸中日夜愤惋求一快意非浅浅也然卒不与之敌者非仁也势也帝之时外有匈奴之忧内有诸侯之患诸侯往往尾大於身指大於臂包陆梁不轨之心覷间伺隙以幸国家之有事使文帝忘自照之机怀泄迹之念扫境内而从事於匈奴则诸侯之兵必乘虚西向汉之社稷未可知也且文帝尝幸太原欲北伐匈奴丞相之兵未及越境而济北之叛师已起是其於匈奴之强安得而不少忍也哉譬犹一身之间有腹心之患有肤腠之疾今有人病方在腹心未知所以疗之之术而肤腠之间有不利焉不能少忍以待腹心之安悍药毒石杂然而并进而肤腠之疾未去而吾之腹心已困有不速死者几希矣此文帝和亲匈奴之志也其後一传而至孝景用主父偃之谋分建子弟而诸侯之势弱矣再传而至於武帝中国旷然无内顾之忧於是力征深入大举以伐匈奴匈奴消缩远遁甘心款塞请命於下吏而终汉之世边陲无警呜呼汉之为汉所以图匈奴者何其不苟也哉

策问四首

中庸发题

礼记一书其言制度文为之用刑名度数之学备矣而根原所自皆由中庸大学中出学者於此苟有觉处则威仪三千曲礼三百皆吾性分中物耳今日之说请先自中庸始中之一字圣人传心之机要授道之关键子思之学出於曾子曾子之在圣门其传道之际盖辛苦艰难而後有得非如古者以圣传圣之易也古者自尧舜至於禹汤文武周公相传是道或应於猝遽

之间或契於数百年之远彼以心传此以心受心机所照一一相印天地鬼神四时日月不能间碍至於夫子从而游者皆中智之士难疑答问其言无不及惟中一字未尝敢以语人夫子之不语人非秘也盖中智之士人欲未除利心犹存其於道也可使得之於自觉不可使受之於听闻得之於自觉则其得也难而功大听之於所闻则其得也易而无力是故必托宿於物假途於事随其根性示以入路教人以礼乐使人於礼乐上求中教人以仁义使人於仁义上求中教人以忠信使人於忠信上求中教人以孝悌使人於孝悌上求中庶乎触之於彼应之於心一念了然中固我有然而七十子三千之徒竟无一人能领其机者幸而有一顏子不幸交臂而失之夫子忧焉於是举其极处示之而名之曰一夫一也者所谓吾无隐乎尔者也所谓如有所立卓尔者也夫子尝以此示之子贡曰赐也女以予为多学而识之者与对曰然非与曰非也予一以贯之使子贡能领此机则必一语之下雷惊风动间不容髮惜乎不能识之默无一辞以措於是不得已又以此示之曾子曰参乎吾道一以贯之惟曾子识夫执中之要正在於此故略不嫌避当机而发应之曰唯一唯之对大中豁焉夫子平生忧勤焦劳求得其人分付是道而曾子一唯毕其能事呜呼大圣人之门陶链人物可谓难也已矣曾子既得是道见夫传受之难如此故常覆护此机不敢轻示观其答门人之问则曰夫子之道忠恕而已矣是亦圣人设教之遗意也乃若子思亲得其传於曾子者也谓夫子没不及见而师之又世无曾子此问此唯寂寥谁传於是尽以所学作为中庸以示後学中庸之书出而圣人传心之机要授道之关键一切陈露而不可掩漏天之机泄神之秘而出於子思之不得已学者读其书识其原苟能於意言之外自有觉处则无负於子思无负於曾子无负於吾夫子矣其勉之哉

问民力

民者国之根本也根本一摇枝叶随仆是以有天下者爱护休养非甚不得已不敢少挠其间故虽廊庙焦劳而迫趣之声不至田里国务倥偬而急呼疾走不见於道路惧摇其本也恭惟主上圣德如天含覆万宇国家晏安无有外事方欲培根固本以图不世之烈视一物之不平一民之失所救恤保惠惟恐不及虽尧舜三王之用心不是过也是宜人情愉愉既泰且舒有以上副九重爱养民力之意今州县之间骚然无聊邮无羽书之驰而符檄如星火军无发兴之急而调度如鼎沸四境无战争之声烽燧之警而吾民惊惧忧患如不朝夕此其故何哉意者上下逃责无敢避其事与然澄源则流清宜必有术矣周之时外有昆夷之患北有玁狁之难命将遣戍若不暇给今观鹿鸣诸诗君臣上下优游燕乐天下之民方且为饮食之用方今中外乂寧而煎熬峻急乃反如是何也诸君讲闻高谊忧国爱民岂无可行之策愿详言之有司将采以献

问三江五湖

楚泽云梦之广楚人能赋之晋都山河之固晋人能言之四方山林川泽之辨不由其人而议焉未见其当也诸君吴人也敢以吴之事问书曰三江既入震泽底定范蠡乘扁舟出三江之口入五湖之中则三江接於震泽若无疑矣说者或穷其源而取山岷山崃山之远或循其流而取江岷江九江条分之叙或别其势而取松江浙江浦阳之隔意者三江之名固自有所邪

禹贡所载何独於震泽言之也司马氏史记索隐以吴松为南江毗陵为北江阳羨为中江图志是其说谓三者入於海则势有所泄是以底定此为得矣然禹之导江悉汇於彭蠡而南北中之流始分故彭蠡潏然後三江入则三江之名又似在彭蠡之左右者前之说果信乎否也五湖为太湖之异名谓其所纳之流有五也张勃言之图志又从而是之矣或者以其旁之四湖与太湖而五其说不为无本及观国语载吴越战於五湖而左氏直谓之笠泽异名之说似未可轻议然太湖之广三万六千顷环五百余里周旋长洲毗陵阳羨霅川之间自湖至海并岸之浦百数则所纳岂止五而已哉至於周官言扬州其薮泽曰具区其浸曰五湖则太湖之与五湖本自为两途前之说又皆不足据矣岂得无至当之论古者博物君子耻一事之不知穷河源探禹穴无所不至今三江五湖近在於此而不穷其实不可也愿详言之以祛所惑

问地利胜败之异

兵无常机地有定势不易之论也昔者地形图於充国汉宣得以成功山谷陈於马援光武得以决胜盖兵虽以临机为神至於审形势择地利则策之上者也主上以圣神之资运英武之略当宁慨然有复古之志士生斯时蒙被教养其於山川之险要所当讲明而熟究也今愿有问焉汉高由南郑出故道袭陈仓而破之遂下三秦取之之易如此及诸葛亮出散关司马勲出子午道掠秦西鄙皆欲由陈仓以窥关中势非弱於汉也然卒不能越其险而北或云魏延尝言於亮请从褒中循秦岭而东当子午而北不十日可至长安亮不用其计故无功乃若勲之败则又必有说矣不然高祖陈仓之道果可行矣否乎桓温自兗伐燕由金乡凿钜野三百里以達於湖其行可谓径矣然仅止枋头而败及刘裕寻温古迹乃长驱河上与诸将表里进平河洛其功视温反倍或云温之失在於得譙梁而不能通石门若裕之於石门亦尝通矣否乎夫其地同其强弱之势同而成败乃异岂得无至当之论冠圓者知天时履方者知地形为其服而不知其道古人耻焉愿悉言之无略

卷八

钦定四库全书

宫教集卷八 宋 崔敦礼 撰啓三十首

贺梁丞相进书转官啓

敷告治廷诞扬褒册公宰之尊无不统有嘉定令之勤帝王之制可举行爰茂报功之典槐阶增峻袞路生辉恭惟某官敦大而有容刚方而无挠宪章文武而所识者大渊源游夏而不失其传非王道不陈得孟轲之直养以天下自任如伊尹之先知克左右以宅厥师善弥缝而藏诸用属兹宪令浸紊条纲润色之讨论之丕用厘於邦采主张是纲维是盖息纷於教功追春秋笔削之严辨庚甲後先之次既着为律疏为令以庶邦惟正之供必爵以德録以功使万世有辞於永爰昭异数用焕徽章进巍级於文阶衍真畜於采户宠随名至德与位尊萧相图书较若莫逾於画一汉家号令焕然可致於登三福祿无穷勲劳甚盛敦礼夙蒙知己每剧铭心自怜蹇剥之多尚费乾坤之造望相君翹材之馆想见光华系诸侯泮水之宫坐倾意气

贺陈丞相加少保啓

诞扬明制光拜殊恩星使从天奉三孤之典策夏车照路新一品之威仪中外耸闻搢绅交庆窃以盛德者必宠数极而後称位高者惟物望重而乃宜浩乎天下之显名至矣朝廷之尊爵善美兼具古今所难恭惟某官广大閎深光明杰特屹如底柱立於中流巍然巨山镇夫羣岳忠诚结主身虽外而眷益尊道义莩民口不言而人自服久厌烦於揆路兹均秩於留京条教简清恩威浹洽万室享阜丰之乐十城蒙安静之休嘉绩殊庸倬彼政成之最崇兹峻秩优哉帝简之深乃眷貳公是为亚保班行肃穆具瞻希冕之尊旗纛光华咸识通彊之显褒荣絶等礼貌加隆赏中伯之蕃宣斯为盛甚锡周公之袞綉伫即还归敦礼揣分至微受知特异兹与观於盛事实倍喜於常情再念孤踪密依数仞窃起梯云之望因忘跃冶之慚跂外朝左棘之联益倾意气置清庙黄钟之列尚丐吹嘘

贺陈丞相帅建康啓

拜恩中陞分镇陪京天语粹温亲授保厘之册民情爰说尚存憩茭之棠开府云初载涂有喜恭惟某官为国大老作民先知安危治乱而自任以诚去就行藏而弗失其正德业深厚虽处晦而誉益尊道义纯全故不言而人尽服顷厌钧衡之柄屡淹屏翰之居惟尔多方咸渴为霖之望敷此大惠暂勤典钥之行眷是名都素孚善政吏既谙於条教民久洽於恩威聊资卧护之安用释顾忧之重人惟求旧恐席暖之未遑民具尔瞻见袞迎之非晚某逃违墙仞屡易年华自惟踪迹之乖莫致寝兴之敬仰镇临之甚盛欣穷困之焉依愿少须臾观报成於政最於女信宿行赋咏於公归

代丘守贺扬州王枢密帅开府啓

抗旌临部拥节开藩紫极凝严照星野斗牛之次碧油整暇护云屯箕翼之师威誉耸传疆陲震肃恭惟某官洪深而刚毅敦大而直方敏识絶人负天地英明之气壮猷经远通古今治乱之原早被遇於冕旒久赞猷於帷幄晋国作三军之制共嗟谋帅之难卫公临五笏之兵亟奋请行之勇是用暂辍西枢之望往分北顾之忧当一面以建牙总全师而制阊百城倚重无边风塞马之惊丹诏疏荣当相印命珪之锡某揣材无取荷眷实深自违行旆之光祗剧摇旌之想地殊吴楚怅莫及於马牛风寄东南同贺成於燕雀

代叶仓贺虞使相帅蜀啓

宠辞台轴出抚坤维希冕篆车备威仪於亚保高牙大纛严节制於中权典策传行搢绅耸叹恭惟某官洪深而刚毅敦大而直方敏识絶人负天地英明之气壮猷经远達古今治乱之原勇见义以必为智临机而益果笑谈却敌亲焚赤壁之舟慷慨兴邦誓击中流之楫蕃裔丧气朝野承风久积望於要涂旋跻荣於魁柄彰施王度掌握化枢乘千龄相与之期恢万世无疆之业勋劳甚盛眷注方深遽形纳政之辞期遂退身之逸观来章之屡却终去志之莫回裴令未衰宜护北门之寄卫公虽老暂临西海之师锡徽号以便蕃贲宠章而赫奕肆畴体貌勉宽顾忧传檄而定三秦当有光於汉业破斧而征四国岂久咏於周人即观袞绣之归式慰冕旒之想某受材无取荷德最深惟廊庙之势严帐门墙之情隔永怀恩遇祇剧铭镌兹盛事之播闻倍常情而增喜驰使臣之轺传久睽礼絶之仪望丞相之安车行展班迎之敬

代贺沈枢帅荆南啓

光膺帝制出镇帅符登四辅以赞猷久积西枢之望总十连而作镇用宽北顾之忧邮驿播传华裔聳听恭惟某官济时鉅德命世宗工负应变之材智酬方而无滞励匪躬之节勇见义而必为早被眷於宸旒亟进跻於政路谟明国论化斡天枢惟荆楚之奥区控巴吴之要会属大事而当一面孰为上行谋元帅而作三军莫如公重爰辍筦枢之任往分制阊之权草木莫不知威旌麾为之改色贤於长城远矣姑卧护於雄藩是以袞衣归兮伫疾驰於召节某居惭庸鄙夙荷獎提闻显册之传行激懦廉而起立旗旄夹道伫听呵从之临鞞袴迎郊当致小侯之敬

贺魏丞相复职啓

发号明庭还荣秘殿隆名赫奕具昭帝简之深懽诵流传咸切公归之僊恭惟某官经邦元老间世巨儒事业着於两朝德行冠乎一代出藩入辅惟备罄於忠劳坎止流行了不惊於得失退遂碧溪之乐远追緑野之高辞荣鼎鼐而道益尊晦迹山林而名愈白僊应简注显有褒嘉虽舆论之未充谅纶恩之沓至人惟求旧即观周袞之迎民具尔瞻悉起傅霖之望敦礼自违墙仞屡易年华属稔积於罪愆洊遭罹於忧祸哀思匪极但惊日月之流名姓不祥恕致寒暄之问

贺许正言啓

恭审光被宸纶晋司言责正人生气公论属心窃以草茅寒素口诵当时之故而常苦无路以献诚搢绅大夫心知时政之非而不敢出位以要誉虽在道人使谏之世常怀有阙莫闻之忧设为补遗之官专以风议为职上而君举之得失下而官联之正邪大而社稷安危兆朕之间繁及号令否若几微之际凡关有政皆得肆言浅之至於诵祈招道饘粥而人不议其迂深之至於引帝裾攀殿檻而衆不指其过士而得逢其亨会时哉足展其生平而况三宅并登四门无壅有猷则告何用不臧恭惟某官雅量渊沈清规峻整博大高明之学追配古人雄深辨丽之文标表後作一日掀翔而名塞乎宇宙十年流落而志适於江湖迨趋访对之严深结眷知之异七日复而有道虽云消长之常六月息而遂高益见扶摇之远玉府擅校讐之誉粉闱扬端靖之风爰陟谏坡允符舆论昔日布衣得方寸之地犹能明目张胆以进谏言今以争臣亲咫尺之天岂憚逆指犯顔而论大事谅三进以及溜当一言而兴邦流涕陈风俗之原愿闻耳矣抗疏陈高丽之役更切迟之敦礼倾幸攀缘猥蒙盼睐自别慈恩之会浸迷簿领之尘下馆翹心仰高惟久尺题展敬修问莫遑侧听诏除倍倾意向国多君子未可议共知吾道之尊朝得直臣必太平敢先有识之贺

贺吏部陈尚书新除啓

恭审入覲宸廷晋长铨省方召还之下谓当政路之立登逮除目之行靡有輿情之未厌恭惟某官洪深而肃括敦大而直方素所经纶措国势於宝鼎之重若时规画玩敌人於指掌之间与道偕行遇坎则止有蘊莫见善刀而藏孰谋不臧而召後来之失何见之早允合当时之言兹趣冠於禁严实渐跻於翊辅论国体於治乱安危之际士方倾属於斯总人材於身言书判之间公特游戏焉耳敦礼顷缘文艺滥托门墙逖闻成命之传爰修竿牍敬致责贤之义少赞埃

谢魏丞相荐剡啓

泮水充员正负素餐之媿公车剡奏遽膺华袞之褒方捧檄以欣然觉登门而荣甚恩深特達感极镌铭窃以进身之阶未免求闻於先達知音之遇所难见听於钜公盖惟人物之评允系钧衡之论攀缘匪易遭际甚艰固有扫舍人之门而藉以求通至或上宰相之书而竟於不报若乃事逢其适志遂所图肺腑情之墨未乾荐士之章已至靖惟忝冒可谓阔疏如敦礼者刍俚材疏株愚智短啖牛心而快赏夙勉壮图咀熊胆以自强居怀僻学兹滥巾於讲席获肆志於尘编仰屋着书萃嘲评於尚白闭门作字殫思虑於炙青但矻矻以惟勤颇栖栖而焉薄窃尝闻道於昔日所愿记名於下风然细者为桷大者为杗莫匪因材而有取顾拥不中绳卷不中矩则将无用而安收深怀跃冶之慚徒起望洋之叹敢图裁监罔弃凡庸以一言一行而识其生平之为遂三沐三薰而置之子弟之列宠其微分被以美辞念读书仅记於姓名未尝博极且作语漫知於平仄自媿拙艰而乃借其学贍之称加以文雄之誉谓宜到远更厚所期在己反求於实何有登臚胥於尊俎之列昔固惧其非堪饰土木以锦绣之文今愈知其甚过兹盖恭遇某官甄陶士类表烛人材以罗络古今之术而下取於空疎以经纬天地之工而俯收於

謏薄荷恩若此抚已知荣敦礼敢不勉厥进修益其涵养於斯二者何以副溢美之言苟有一焉亦足为知己之报

代赵宰谢诸司列荐啓

下邑承流方积素餐之愧剡章合荐误膺华袞之褒宠忽出於非常誉深惭於过实窃惟建业要冲之地是为名流鼎集之区开帅阃以建藩登使车而揽辔非搢绅之重望则廊庙之近臣皆一时钧鼎之储简九陛冕旒之眷孰不萌於攀附期少借於辉光然取知固难於异同而求进岂无於遇否惟善人能举类曲借吹嘘诸大夫皆曰贤诚为希阔顾兹公举宜属异材如某者识昧以疎性愚且拙隆师亲友孰知行己之方应举覓官徒为干禄之计夤缘宰邑强勉莅民推所学则必务於力行持其已则敢思於自怠察催科之积弊必简其目以深防吏奸惧盗贼之肆行每严其责而力除民蠹讼不忘於审听刑惟近於用寬虽怀黽勉之诚未见毫厘之效而乃迹其学术褒以廉勤有畏威不扰之称借揆法当情之誉退求诸己实愧乃心兹盖恭遇某官名冠伦魁道升闕奥奕奕明堂之柱栋煌煌清庙之璠璵方其参率金言俯收後进自惟凡陋之质曷称獎提之恩某敢不益励前修愈坚素履诸公令出门下固已蒙交举之荣贱士见遇大贤当力图知己之报

谢蔡总卿京剡啓

郡序充员本无题目公车剡奏乃有姓名深衔特達之恩辄叙感铭之悃窃以有俊即俊为政举尔所知惟贤知贤观臣以其所主自往古进贤之浸远致清朝荐士之絶希但问燕公嗣鲁公甥类皆然耳不数顔氏孙闵氏子良可怜哉炎炎嚙???之门扰扰驰奔之地掣其肘而夺者悉由非意谋於心而诺者宁复自如此所以金人腐夫掉臂而争先端人良士卷舌而藏口若乃事无其素人莫之先一见已定其生平片言遂加於褒饰正宜於古人求耳岂得於兹世见之必有轶材乃堪明举如敦礼者株愚智短刍俚材微蠹编虽力於讲论徇曲不离於陈腐本非时用偶然束缚於官常方自山来安能曲折於人事亦惟凭藉使者二天之大力乃得栖迟诸侯泮水之间而术业荒疎性资简质自甘为迂儒之陋学何以辱明公之重言敢意误知遽先论荐贡昌歟於玉食窃叹嗜偏登太羹於庙堂亦将存古曲借吹嘘之赐亦知刻画之劳事既罕而遇难恩愈深而感切兹盖恭遇某官性天宏阔心地坦夷解十二牛而斲若新材具见恢恢之裕息九万里而风在下功名观鼎鼎之隆方且以獎提後进为政经以收拾英材为己任顾兹庸妄亦被荐扬敦礼敢不勉厥进修厚其涵养心焉自省何以副溢美之言学以力行亦足为知己之报

贺萧察院啓

光膺芝检进陟栢台国用正人士无异论或谓朝家有硕大无朋之福乃付纲宪於庄重不挠之臣顒昂之色足以肃穆周行正大之言足以维持公道精神所向风采益新衆皆曰贤国由是重恭惟某官天球比粹庙璫凝珍以懿文奥学根柢六经以亮节清规羽仪多士汪翔令问登陟华津议礼奉常久着详明之誉绳愆宪府更观謇谔之风即被殊迁尽施素蕴某夙亲余

论窃叹英猷竦闻除命之来倍极得人之喜绣衣行部阻陪贺客之趋铁柱端朝逖仰官仪之盛

上平江汪守啓

改命頼宫抗尘大府望门墙之峻坐知观海之难亲道德之光预期蒙露之润恭惟某官本朝硕德吾道宗师声塞天地而居有谦虚抑损之诚学洞古今而達以直方正大之气天之所降以开觉一世上之所待以经纶四方泓渟台鼎之?偃息藩州之望惟从容中外之际皆能为国之光辉顾寻常进退之间初不系公之轻重竚孚輿德益懋熙图敦礼乡校诸生儒科晚进一命埃尘之域十年萍梗之踪得次省曹不才宜汰濫巾师席非称为慚宁独冷之为怀窃羣嘲之是虑斯文不坠寄子敢自许以抗顔天下中庸有公庶得归於折衷

迓平江丘守啓

宠膺宸綬就易守符四境闻鷄犬之音既允沾於河润两界接耕桑之迹将均芘於棠陰凡在帡幪率同庆拚恭惟某官气有所养而刚大学无不通而高明四十围溜雨之皮材自难於小用九万里培风之翼志不局於卑飞籥巍级以舒翹踔华途而登步将膺柄用姑试事功班郡国之春去天不远见长安之日易地皆然当即驰尺一之书岂久紆丈二之组敦礼顽冥益甚奇蹇异常迟次省曹披沙见类濫巾师席附赘为慚侧闻千骑之来深激寸心之喜诸侯泮水庶善颂之可賡刺史二天岂私恩之敢冀

通向守啓

政成苕水地易吴都符竹洊分优被九重之眷溪山相接载披三辅之图荷兹帡幪敢申欢庆恭惟某官天趣高明风?峻整材锋淬砺数千牛刃发於硎宦路扶摇九万里风斯在下揽轡着澄清之略拥麾高办治之功飞盖鼎来政及班春之候赐环催拜伫陪半夜之谈敦礼鋤桀陋儒诗书素业省曹迟次既类披沙讲席濫巾更慚附赘先生万古愧奚有於师资刺史二天倘可逃於吏议

通乡守啓

随牒转移将道粉榆之里望风怀想敢修桑梓之恭敬掣斋铃用驰书牒恭惟某官夜光宝器乔木故家一朝解十二牛地有余於游刃六月息九万里翼姑戢於垂云行颁尺一之书入奉九重之对敦礼久焉飘泊适此经从凤集江华有媿杨公之瑞鹤归辽海空慚丁令之来

代人通乡守啓

十年流落未忘越舄之吟千里来归愿识荆州之面披承非远欣幸良多恭惟某官德宇粹夷性天昭彻政妙斲轮之手材全游刃之神借重江城聊佩左鱼之贵言还帝里即符画鹿之祥

某远逐宦游饱闻政誉徒愧小人之怀土望旧国以怅然愿同君子之居邦事大夫之贤者

代王宪答向守啓

光膺中诏易镇巨藩接壤闻风已着恩威之素褰帷布政载观条教之孚恭惟某官敏悟絶伦清机昭理六月息九万里久展修程一朝解十二牛共高余刃历试循良之绩即登严近之途某宦路差池风期辽邈方喜承顔之迓遽承贻翰之先感佩之私敷宣罔既

代李仓回向守啓

显膺宸綍就易藩麾遗爱在人增苕霅溪山之胜先声及物动吴松风月之辉与在听闻良深赞喜恭惟某官清机昭理沉识潜微鼎鼎弥高发盛名於一世恢恢多裕絶敏悟於千人使星高峻整之风侯屏着循良之誉奏计方优於吏课改符旋被於恩书褰帷露冕而见吏民伫闻异绩珥笔持橐而列侍从即展宏图某自顾凡材滥将隆指轺车游历屡逢倾盖之欢铃合从容行慰盍簪之愿

代叶仓答张守啓

锋车趣覲荣分五马之辉函教鼎来遽被双鱼之贶服撝谦之过厚惭展庆之有稽恭惟某官庙璫珍凝羸金学富植丰规而辉国流华问以被民朝一人而拔尤首膺鸛荐昼三接而用锡亲畀鱼符岂州县之职徒劳将公侯之家必复祥已符於画鹿世当嗣於青氈某久矣游从兹焉幸会扶风之课最於三辅知河润之溥沾刺史之职察以六条庶露行之有赖

贺马守啓

显膺宸綍出镇辅藩九棘平反夙着名卿之望一麾分守爰膺良翰之求恭惟某官天趣高明风?峻整发盛名於一世絶敏悟於千人卿序联华垂近金螯之直藩城择牧聊分铜虎之符眷威誉之素隆兹輿情之允協紆丈二之组即闻奏课之优驰尺一之书当奉受厘之对敦礼诗书素履鋤桀陋儒迟次省曹披沙见汰滥巾师席附赘为惭侧听千骑之临深激寸衷之喜先生万古愧何取於师资刺史二天庶可逃於吏议

谢丘守京剡啓

泮水投闲本无梯援公车剡奏乃有姓名檄初捧以欣然门获登而荣甚窃以昔者论荐存乎至公士之求知贵於以正故车下之歌不由於借助而河东之辟尽絶於属书古道邈然流风竭矣容容徒炙手之附帖帖惟捩鼻之从有以先容虽枯木朽株而增重无因自至以夜光明月而见疑是非罔出於本心取予浸流於市道敦礼不肖抑又奚云方自山来不知曲折於人事岂堪世用偶兹束缚於官常僻拙自喜既莫求先容謇讷无华又不能巧进略无蜚蚁可援之势徒有蚊虻求附之心倘诸公令出其门固所愿也求贵人借助以势詎肯为哉自甘为无

用之迂儒何敢几荐贤之重诺岂意高明之鑒不遗介特之踪登太羹於庙堂亦将存古贡昌歜於玉食窃叹嗜偏兹盖恭遇某官高明自得於天资予诺不随於世俗以收拾寒士为己任以矫拂颓风为政经曾是妄庸亦叨獎拔敦礼素虽至愚而极陋今益自信而不疑直道是行终戒用人之诮厚恩难报漫怀知己之私

贺王守改知建康啓

恭审政取侯藩位隆连帅江山相望既惠养之素孚旌棨就临喜教条之均被帡幪所暨闔悻惟同恭惟某官奥业丕天清?辉国海涵地负浩乎学问之内充月润日光倬彼声猷之外发以一日而先多士由片言而结上知紬书增东壁之辉持被应列星之次历华贯於凤阁鸾台之地誉处弥休望清光於鷄翘豹尾之间班行益峻属倦承明之直荐分刺史之权智妙神明仁深寬宥折狱无非於破的拨烦罔见於全牛德洽庐陵召伯之棠犹在化行宣郡齐侯之政已成爰膺斧展之求亟畀玉符之托由列郡而付留都之重实劝乃功因近藩而开师闕之崇就宏斯政矧时建业实号要冲箕翼舒张列千屯之玉帐虎龙蟠踞护万雉之金城人物浩穰山川盛丽居守之任兹借重於名臣入拜之阶姑积资於鉅望敦礼迂违陋学偏侧凡材追时好以取世资偶叨科级去民亩而就吏禄遂困尘埃惟平时慕用之深有迺日趋承之便官程迫趣方恨远於崇墉邮驿传闻喜获依於大茆

服闋上周内翰啓

自远声光浸罹忧患哀思匪极但惊岁月之移名姓不祥莫致寒暄之间追兹终制爾尔残生收召散魂强追陪於人事飞驰精思实向慕於师门伏审演润金螯讲论清燕明灵具介福祿丛臻恭惟某官学富经纶器全端亮高文大册发为天子之光劲节冲规播在輿人之颂虽躬谦之已甚如物论之浩然雍容翰墨之林枢轴钧衡之望谋参禁密被眷宠以方深礼絶坐间谅登庸之非晚敦礼伶俜弱质孤露余年省厥艰难有如痛定奄然喘息岂自意全永纏风树之悲曷胜松楸之恋从先王之礼姑不齿於三年和夫子之琴冀得门於数仞金气澄肃玉堂靖严惟善含於天和即进登於台轴

上王尚书啓

随牒转移久客诸侯之幕望风倾想未登夫子之堂盖惟位貌之间殊且复姓名之埋没蔑闻介绍敢干冒进之诛自分陆沉但近退藏之守迹虽隣於简外心实注於高明不修参候之仪曷见依归之悃伏惟铨衡多暇宝练维和积有休祥丛护兴寝恭惟某官以堪輿浩直之气负邦国经纶之材智虑精微而发之以刚论议慷慨而据之以直力行已学亲结上知善策奇谋允矣渊衷之合公言直道翕然衆正之孚周旋八座之班行重叠诸儒之讲席禁途积望久已熟於民瞻揆路登庸谅方深於帝简敦礼迂愚自守蹇薄多奇治乱之原亦尝志一两大者功名之事岂得无尺寸望焉初心坐叹於乖违半世已成於蹭蹬顾屯遭之已甚曾趋操之不移窃尝向慕於门墙所愿依承於几杖事随势夺时与命睽披云雾之天曷慰平生之志望星辰之履不知精爽之驰

上方平江啓

祇奉诏纶载新郡级政成甄越已膺计最之褒地胜吴松更倚老成之重江山改观草木知威恭惟某官吏道宗师士林耆旧材大备更於盘错望尊咸服於典刑数千牛游刃之余劘若新而不顿九万里培风之力积既厚以弥高时惟黄髮之英深简丹心之眷去天不远既颁郡国之春易地皆然更近长安之日岂久紆丈二之组当即驰尺一之书敦礼鉉槩陋儒门墙下士系一官而漂泊瞻数仞以翹思侧聆千骑之临深激寸心之喜

上范舍人啓

逖违风度浸越年华望北海之洋久已遯精神於门墙之下歌南山之粲庶几定平生於言语之间敢勤躡履之迎用慰执鞭之慕窃以先觉達後觉虽有迪於见闻下风应上风亦相寻於气类万宝毕趋於都会衆流争湊於巨川寥乎大雅之衰甚矣斯文之弊琐碎焜燿既不能混融天地之纯全朴鄙艰深又无以轆轤日星之经纬哇咬衆作鹵莽一涂遗音泯泯以无闻余沥涓涓而将竭钦惟文伯大起儒风道四时之气而泄其馥落百氏之华而食其实测之益远灏灏大而浑浑全动而徐盈涵涵停而秩秩积骖英猷而溥畅靡羣作以披纷张咸池而乐洞庭已眩钧天之奏登泰山而小天下益知丘垤之卑然而道大则物必兼容名盛则衆斯咸慕虽问途岂资於老马然致士方揖於怒蛙敢叙悃私重尘听莹伏念敦礼株愚智短乌俚才微素蘊壮图啖牛心而快赏居怀强学咀熊胆以助勤殫思虑於炙青萃嘲评於尚白顾欲摭摛踊跃而涉其级颇觉沉浸醲郁而作为文扬雄深戒於篆雕枚乘终流於骴馘规规摹古欲捧腹以效顰忽忽求奇竟谨毛而失貌间关干禄弔勉应书裂繻上国之游倚袂公车之後仲舒对策本独守於春秋德裕擢科欲不藏於文选虽自觉学行而失步亦未忍转衣而为裳抽余韵於乙冥索微言於栗密旁魄而论都邑人多笑其为狂矜夸而赋山河已亦知其成癖访遗迹於官馆城池之异覃苦思於垣墙藩溷之间成章不知所之深负小子斐然之媿不敏庶斯達矣愿闻先生莞尔之谈虽磁石铁以类相从实风马牛势常不及岂意广文之席适迓舍人之门麈尾余论妙理时闻鸛杖胜游高风日至披冲襟而向道饰芜累以修容战蚁詎足以胜雷髯虵岂容于登俎斯文不坠寄子敢自异于名论天下中庸有公庶获依於折衷恭惟某官包罗百氏磅礴九流以辉煌汗漫之作而执耳文盟以博大高明之资而盱衡士类一言嘘善四海倾风自顾虽无玉佩琼琚而放厥词庶几足免明月夜光而投之暗鼎一尝而未美鸡数跼而尚知览进学解而誉史才必得之哇迺之外诵鸛鷀赋而许王佐亦覩于辞气之间敢期战塲吊古遂识其精思正恐吴江落枫不如其所见仰祈裁鉴曲借甄收

贺镇江张尚书啓

抗旌临郡揆日开藩风月万家顿改江山之观耕桑千里已闻襦袴之謡将敬掣於斋铃敢情驰於书牋恭惟某官器涵端亮道蘊直方流华问以被民凜清规而照国星辰曳履居文昌八座之崇铜竹分符拥东方千骑之贵兹坐棠之未久知游刃之多余上计独优岂待五月而报赐环催拜即陪半夜之谈敦礼深媿材凡每勤意予方怀章而言迈愧投辖之无从自违行旆之光愈极摇旌之想室迩而人甚远虽阻奉於色辞波及者君之余喜密承於芘润

卷九

钦定四库全书

宫教集卷九 宋 崔敦礼 撰后十九首

问候李殿院后

汉殿追随偶拔科级秦淮邂逅浸閱年华伏在贱微竦闻登用亦尝得余论之末私窃高下风之行以为朝有正臣自应享安乐得贤之福士无异论岂特为夤缘托契之光伏惟执法居中自天业祉恭以某官受材英特养气浑全高明博大之学地负而海涵雄深辨丽之文波属而云委植丰规而晖日絶高举以培风踔厉亨涂汪翔华问深结宸知之异晋司台察之明柱下昂藏衆目为真御史班心突兀世有此古丈夫而自肃穆端朝雍容造膝以纪纲不立为大耻以风俗未正为深忧剔除巨蠹於盘根错节之时排斥贵臣於盛意隆指之际凜然风采之盛鬯厥精神之敷不特淮南憚汲黯而寝谋抑使晋人畏晏婴而听命岂非忠纯不二而学足以守其道辅以机变无穷而辩足以申其言用能谋无不从绩乃可底敦礼夙闻高谊深叹絶尘礼虽後於衆人喜实先於流辈兹布尺题而展问窃倾下馆以翹心趋延英门而大言莫究欢愉之素弄大夫印而遂拜徒均矚望之情火候铄流台纲严靖愿益精於调卫庶茂对於光亨

通漕使后

岩邑警巡假声猷之自旧頓宫诵说托封部以为光适当受察之初敢後修容之敬恭惟某官清机昭理涵德真淳材推游刃之神政妙斲轮之手给饷馈不絶粮道方资流马之功见言面略无几微更奉单车之聘辑劳能之甚卓积誉处以弥休行被褒嘉晋膺宠拜某尘埃一命萍梗十年俾汰才省署之中乃得禄吴门之近方息肩之云始属抗节以言还徒以旅进之间莫罄久违之悃遡仞墙而企踵未卜趋参凭尺素以函心曷穷称述

通陈运使后

卑栖赤尉甘奔走於尘埃瞻望皇华行依承於条教幸由天假恩有地归恭惟某官德宇邃夷性天昭旷文章政事为仕路之表仪儒雅风流揖古人之标致徊翔中外更练事功顷分守於淮邦已蔼闻於政誉得贤吏严明之要知足破奸当公堂剖决之时言皆中的民隐灼知於纖芥吏欺洞见於秋毫圉圉屡空里閭不扰至今通民之相语咸言召父之复生铭德政於无穷爱甘棠而勿翦星霜浸越位貌益隆属戎事之方兴正边疆之未靖六师贾勇将电扫以风驰万口张颐非鬼输而天雨爰屈澄清之略往司飞挽之权天子有事匈奴军储是急关中既得相国粮道何忧伫书盟府之勲即正台衡之拜有心所冀不谋而同某淮海微生簪纓下列早奉箕裘之训滥叨科第之名重惟桑梓之奥区曾是蕃垣之旧服更时已久尚腾籍籍之欢声拜履无从徒戴家家之画像不图今日获趋下风金就砺木从绳行克承於约束鷄司晨犬吠盗当祇服於使令

通魏丞相启

省曹掌故尝叨进牍之私郡序司文更倚建牙之重托洪钧而惟旧企森戟以知归恭掣斋铃敬驰书牒恭惟某官端朝首德柱国宗臣气全浑厚而养之以纯诚识造高明而达之以刚大感会明昌之运发舒经济之图排难厌纷亮节着艰难之际赞元经体真工藏辅相之中辟公道而多士兴明大纲而百揆叙裴度稍从於緑野谢安实系於苍生闵烦政路之崇借重吴门之近香凝燕寝面千里之湖山吏退公衙赏万家之风月虽上眷优隆於敬老恐朝臣图任而贪贤敦礼名第凡流淮乡下士一命簪绅之底三年箠楚之中念作吏以困风尘尝橐书而上京国望翹材之馆窃叹於无阶伏光范之门敢嫌於自赞重尘藻监深枉名论欲乘时渐致於亨衢使隶职近居於华省得鱼难兼熊掌方安需次之渺茫失东复收桑榆所喜坐曹之清简已驱车而于迈适开府之云初望不素然幸寧有此鲁侯戾止行与听鸾声之龢周公归兮恐难稽袞服之拜

通问梁舍人启

攀缘科级尝叨末契之光睽异色辞益叹絶尘之远敢修狂斐上叩崇明窃以同年之义在昔所敦末俗之浇於今特甚队趋行入曾不问其孰何君北我南了无知其在否交情淡薄古道凋零倘拘分貌之间遂隔门墙之望则将习久无复余风因忘贵贱之殊辄叙兴居之敬恭惟某官风华灵茂天韵浑沦秉清德以照人植丰规而辉国正辞简古鄙衆作之小成奥学博通卑羣言之近用早奉大廷之策亟先多士之胪贯穿道原老先生率皆敛手昭陈国体圣天子亦为改容道与时行宠随名至骛休名而旁畅蹕华贯以立登太一前临拂芸香而夜直列星上应含鷄舌以朝趋兹峻陟於殿坳用密亲於帝仗戎冠紫殿珥笔丹墀其在有唐或倚登於相位至於近代亦平进於左班即被殊迁用摅素蘊敦礼殊愚智短漫漶才疎学自守於僻迂文敢专於雕篆抽楚謡汉风之余思所愿尽心恭南昌北部之贱官未知免戾念昔慈恩之会获偕驺御之僊年除月迁已分云泥之隔气求声应尚怜草木之同坎令方深朔风增劲愿益调於冲粹以茂对乎光亨

答费知府启

光膺除书荣领祠馆伏惟庆慰某官文高艺苑望重儒林怀郡守之印章适所向之弗偶奉僊家之香火何自取之太廉载惟么麼之资岂有揄扬之助过形谢牒益重愧容感戢维深敷宣罔既

答常熟赵簿启

籍甚多才之誉所愿识贤粲然一纸之书胡为及我恭惟某官珍凝庙璫秀毓天潢材磊落以不羣识疏明而无滞鸾凤翔千仞之上岂枳棘之卑栖鲲鹏抟万里之遥伫风云之横奋敦礼久焉仰德幸矣为僚末路飘零将露行之蒙润高堂灿烂期烛影之分光

回吴江邵宰启

秦淮风月尚怀挥麈之谈吴会山川行听落枫之句久焉契阔幸矣逢迎恭惟某官襟韵踈明英华灵茂泳修汉而擢秀抱明月以扬辉种河阳一县之花此其暂耳览策府羣山之玉衆窃迟之敦礼随牒宦途滥巾师席羣嘲漫解初无诸公衮衮之荣一笑相逢赖有故人恋恋之意

回吴江吕宰启

里巷游从共饮投金之水官曹联接更依浮玉之堂帐一别之时深披尺题而心喜恭惟某官夜光宝器乔木名家材推游刃之神政妙斲轮之手鲁恭有三异之政行亲见之公琰非百里之材岂久淹者敦礼宦途随牒师席滥巾媿无诸公衮衮之荣赖有故人恋恋之意种河阳之桃李预期寒谷之春采泮水之藻芹坐释广文之冷

答钱倅启

光奉宸恩荣关郡政别驾贰於刺史行观条教之孚广文独为冷官幸托仁贤之芘披尺题而增喜跂数仞以驰诚恭惟某官质粹天球珍凝庙璫七貂世胄金张之业有辉万石家风齐鲁之儒何及骛隆名而旁畅演芳润以宏敷佩王祥之刀已共期於国器题陈蕃之座姑少屈於隳游即着康功径跻要路敦礼诗书素履铅槩陋儒迟次省曹披沙见类滥巾师席附赘为慙召诸生而海之正切羣嘲之虑事大夫之贤者庶几余论之承

代召倅通梁倅启

光奉明纶荣参陪阙当年彩侍交闻曳履之声今日簪朋并列题舆之任遭逢希阔感幸并兼恭惟某官庙璫器珍羣金学富泳修汉而擢秀抱明月以扬辉蔼然誉处之隆籍甚人文之美暂淹远业来佐大藩别驾屏星实凌厉云霄之渐明光画省看登庸衣鉢之传某自愧材凡忝聯世契虽未识老莱氏之子固稔闻万石君之名不自意於飘蓬将获叨於倚玉趋朝并命顾畴昔之难忘同官为寮独於今之何幸

通陆倅启

宾位偶虚猥应辟书之宠官曹相接遂叨寮案之荣跂数仞以驰情修尺题而展敬恭惟某官簪纓望族诗礼名家蘊奥学於羣金粹清姿於庙璫解吕?之佩知器远之难量题仲举之輿信材高之未究伫观环节之下召置闺台之间敦礼与世则踈向风甚久政恨承顔之邈敢期聯事之亲末路飘零幸借露行之润高堂灿烂愿分邻烛之光

回姚都大启

比叨严召获对便朝进西府之末僚还北门之旧直追邯郸之步已故迹之俱忘下楚些之招

觉残魂之渐返恭惟某官至仁嘉善尚义隆谦枉庆问以先之流好辞而宠甚永言登受之谨更重褒藏之荣感佩维深敷宣罔既

答上元尉启

书劒西来琼瑶远及披朶云之字已观作者之风宣彩棒之威更托邻封之芘伏惟某官风华灵茂学问邃纯抱明月以扬辉泳修汉而擢秀宜东观石渠之选岂南昌北部之淹州县之职徒劳人亦聊尔耳神僊之人不易得诎可量哉敦礼密借余辉警巡下邑左右有所虽云循故事於长安东西相望尚足诧英词於文伯

回教官启

青钱妙选窃钦屢中之才黉舍英游行遂披承之愿覩芝眉而非远辱珍翰以为荣恭惟某官天韵浑沦风华灵茂玉井之莲十丈种学甚高丹山之凤九苞摛文特丽暂伫云霄之步宠临芹藻之宫槐市风行聊振扬於木铎花塲影转行入侍於金銮敦礼久闻北斗之名未快景星之覩簪朋盍契窃欣倚玉之光塵尾生风伫听悬河之论

回黄教授启

逖仰风猷铺闻道艺典教之官独冷所愿得朋明经之望鼎来预惭夺席披尺题而增敬企数仞以翹思恭惟某官天韵粹温风华灵茂泳修汉而擢秀抱明月以扬辉学士登瀛洲即奉夜谈之对诸侯集泮水漫为晨入之游敦礼刍俚材疎迂愚智短薄宦几同於附赘横经何有於解颐会面无期每恨荆州之未识为寮何幸获同鲁国之从游

通建康陈留守启

充赋大廷尝玷权衡之鉴效官下邑更依庥庇之余幸出自天恩归有地恭惟某官一代首德四方宗师网罗百氏而发为渊深简古之文根本六经而富以总揽宏博之学约而能肆贍而不华天下皆以吾道之寄命有归於明公明公独为斯文之指南以尽其能事蚤出班行之秀亟膺倚注之隆峩豸冠於霜台惟直道公言之是徇含鷄香於粉省凜清规劲节之不渝藹然直声着在舆论倦锦帐握兰之直从虎符分竹之荣畿辅承流皆一时之重镇湖山相望沸两郡之欢声至今击柝之相闻尽是甘棠之旧?奏课若此入拜则宜兹尚屈於宏材烦总司於留钥属边疆之未靖正戎事之方兴必慈惠足以抚柔吾民而威望足以震叠方面然後国倚长城之固人归爱日之温仰寛顾忧惟得君重第恐夜谈思贾朝命旌黄不容岁月之稽即正钧衡之拜有心所冀不谋而同敦礼生则甚愚性惟嗜学方辞科举之累欲尽文章之功急禄为亲求全於孝养低顔就列遂困於吏尘将偷职事之余益广平生之学庶不忘於黄卷期可致於青云重惟骖骾之文辱在甄收之数蒙厚知之已久趋下风而莫遑不图幸会之来乃备使令之末鷄司晨犬吠盗当祇服於教条金就砺木从绳行敬遵於约束

代人通陈察院启

简自帝衷进居台察正人登用有识叹嗟窃以御史耳目之官实曰朝廷纪纲之地明目张胆足以论庶事之是非正色立朝足以别羣工之邪正自非有夷达寡求之操而能秉质直不欺之诚则何以清肃官联尊崇国势洪惟甚盛之旦大起至公之门副上所求於今尤重恭惟某官清机昭理奥学潜微道义自得於古人趣尚不随於流俗堂堂正论每拒諛而放淫挺挺丰规足廉顽而立懦汪洋盛问更践华津兹优结於隆知遂晋膺於要用一台克正四面属观必将开拓正途尽洗士风之弊维持大法益清邦宪之源即被殊迁大输素蕴某欣闻成命倍激懦悰方祇服於官箴媿莫陪於宾履国多君子未可议乃知吾道之严朝有直臣必太平敢先有识之贺

迂运使黄察院启

光奉纶音荣司漕计当踞虎蟠龙之地鼎会输将妙木牛流马之思坐观赡给声光所暨原隰有辉恭惟某官天韵深纯风猷整拔气刚而大凜清规亮节而不渝道直以方抗崇论宏言而莫屈顷奋鹏程之健峻登乌府之班造膝沃心天下咸受其陰赐明目张胆朝端尽服其精忠清议被民英猷辉世眷言江左实号畿封方蚁聚以云屯用严边备岂鬼输而天雨以济吾师是用畴举异能仰分忧顾有如鉅德实称重权天子有事匈奴军储是急关中既得相国粮道何忧第虞金节之颁召置玉除之列入陪严近大究设施敦礼漫漶学踈株愚智短夙稟颀蒙之质徒多涉猎之功追时好以取世资偶叨科级去民田而就吏禄遂困尘埃闻澄按之来临幸帡幪之有赖绣衣直指行先星凤之瞻大厦既成获戴云天之芘

<集部,别集类,南宋建炎至德佑,宫教集>

卷十

钦定四库全书

宫教集卷十 宋 崔敦礼 撰后十二首

代贺王宣抚加枢密后

诞扬显册登进元枢甲兵之问不至庙堂方托顾忧之重柱石之臣宜居辅弼爰膺宠数之隆廉陛势崇旌旗色动恭惟某官兴邦硕哲命世宗工负应变之材智酬方而无滞厉匪躬之节勇见义而必为登步政途汪翔民誉奇策懋昭於筹幄壮猷密布於机庭倚注方深勲庸滋茂眷言地重是天维要险之区勉为上行辍斗极凝严之望建油幢而立武开幕府以信威天子方委以腹心敌人可玩於股掌器博而用无近式恢经远之图劳大者爵必尊遂冠本兵之任宠随名至道与时行方将传檄而可定三秦岂但折冲而决胜千里焕乎懿绩迈彼前闻某茆迹门墙受恩熔冶耳侧丝纶之下心縻旌戟之间庆公论之咸孚激懦衷而增奋辕门蒲伏徒嗟迹远以无从沙路欢迎行见功成而入拜

代王宪贺王枢密后

涣号明廷升贤右府文昌六曹之长积誉处以弥休北斗七政之枢畀事权而滋重邮音传播士论金谐恭惟某官负器疏通受材肤敏功名自喜深惩无用之空言慷慨必为卓有可观之大节践馱隼轨登步亨途铨筦清华卢李之贤莫及经帷邃穆尧舜之道是陈更任使以浸多辑劳能而更伟上心所简人望攸归肆畴济实之材爰正本兵之柄精神遐畅敢轻秦国之无人勲业增华共庆西平之有子某属将外指侧听中除叩宾合以无阶越輿情而倍喜

代李仓通留守贺洪枢密后

显膺凤诏荣綰麟符便郡承流已奏治平之最陪京司钥就分委寄之隆綬纛有光簪绅相庆恭惟某官应期良弼名世真儒亮节丰规鹗英声而旁畅高文大册靡衆作以分披徧历清华之途遂登宥密之仕稍退休於真馆旋起镇於名藩以匹夫失所为深忧以比屋安居为至乐仁声周浹政誉汪翔尚淹帷幄之明谟来镇江淮之都会关中留相国固已增天堑之雄江左见夷吾当尽复神州之旧某枣昏有素樗散无堪属误领於使华喜密依於乡荫驱驰周道尚睽台座之瞻邂逅都门行见袞衣之入

代梁倅贺留守后

诞敷显册出镇陪京起安石於东山式慰具瞻之望分召公於陝右用寬忧顾之深朝野耸闻搢绅交庆恭惟某官四方魁杰一代宗工明古今治乱之原若指诸掌上達文武弛张之要不出其环中早被遇於上皇荐结知於英主黻纁麟阁政事多所讲明猷豸乌台奸宄为之敛避

昨敌马之南牧窥襄汉之上流凜然独坐之尊屹若长城之阻以身督战运妙谟於帷幄之中为国宣威殄强寇於笑谭之际功勲硕大事业彰明迨参乘於国钧益穆宣於天纬素所蕴蓄固将行道以济时及其经纶真是庇民而尊主虽谗波之遽起致玉铉之微歆从容不改於壮猷进止自安於常度方且养恬闲馆玩味真腴居绿墅以优游结丹衷之怀想眷言江左实号畿封擅虎龙蟠踞之雄萃箕翼张舒之盛若时谋帅尤重得人爰膺倚注之隆全付保厘之寄关中既得相国姑借重於帅藩袞衣以归周公即跻荣於鼎席某簪纓末绪樗栎凡材抱黄卷以游心曷探其域奋青云而振翮尚负初心叨居半刺之聯愧乏寸长之効不图今日得拜下风修属吏之仪行获依於芑润托洪钧之造尚有冀於提撕

代丘帅贺曾漕启

祗膺眷擢荣领漕将行步褰帷逖仰光华之盛专城剖竹幸叨临按之余闻命之顷驰心以喜恭惟某官珍凝庙璫学富羸金流华问以被民植丰?而辉国九卿惟月煌煌苍玉之光五马行春奕奕朱幡之贵硃新不顿斲久逾精尚资心画之余旋畀计台之重伫观成绩径践要途某一别时深尺题问阻匪自为於简慢盖有恃於高明欣闻揽轡之临获在提封之内补苴罅漏自怜五技之穷激浊扬清正倚二天之覆

又代丘守贺吕漕启

被膺书赞荣总漕司锦帐含香久振望郎之誉綉衣将指就扬肤使之华恭惟某官岳峙瓌姿鼎涵淑气表表士林之标的堂堂相阃之规模暂淹材刃之余用领计台之重三十鍾而致粟一石聊寬负海之劳九万里而击水三千未快垂天之便倚奏红陈之课径登紫橐之班某滥职藩宣获叨庇赖固所愿也繫幸会之适然寔能容之将悔尤之可追

又代贺胡漕启

祗膺帝眷入按畿封素洽恩威不改憇棠之旧载行郡国谅多骑竹之迎恭惟某官负器疏通受材肤敏周旋三辅洵敷济剧之声镇抚十连更借偃蕃之重辑劳能之甚卓积简注以资深萧何吾能用之早着飞翰之绩贾生不见久矣亟膺图旧之求不但骊驾辇车而运九年之储固将簪笔持橐而备半夜之问某藩宣亡补旷败为忧技可笑於五穷锦几同於百衲畴昔熟於条教何日忘之乃今奉以周旋固所愿也

又代贺沈漕启

寓直宝储观风畿甸星霜俄易久睽芝宇之瞻綉斧鼎临正托云天之覆欣闻除目实倍常情恭惟某官风韵纯沦声华整拔抗崇论宏议而莫屈凜清规劲节而不渝夙藹着於英猷久徊翔於荣路霜台戢豸凜生白简之风星使乘轺尝鞠緑扉之草旋膺召节趣覲严宸从容陪右府之筹密勿坐郎官之帐谋谟深简眷注益隆伟江左之奥区实吴中之要会当踞虎蟠龙之地鼎会输将必木牛流马之能乃臻贍给有如鉅德实称重权天子有事匈奴军储是赖关中

既得相国粮道何忧第虞金节之班召置玉除之列某荷知有素向德尤深顷季弟备数於幕莲数辱品题之重而贱迹纳交於棣萼几同莫逆之游不图今日之逢获就下风之列识韩荆州之面固夙慰於平生仰苏刺史之天幸密依於巨庇

又代贺吕漕启

疏恩帝制易节畿封安习教条未改憇棠之旧载行郡国谅多骑竹之迎闻命之初驰心以喜恭惟某官受材肤敏负器疏通衍芳润以宏敷鹗隆名而旁畅侯蕃偃息洊扬恺悌之风使指光华屡见澄清之志刷新不顿斲老逾精虽易地以皆然喜去天之不远固将簪笔持橐以备半夜之问岂但輶车骊驾而运九年之储某绵薄何能蕃宣亡补企旌麾而有仰托封部以为荣激浊扬清正倚二天之覆补苴罅漏空怜五技之穷

又贺沈漕启

恭审光被纶言晋司漕计起寇公於河内共徯於登庸留萧相於关中漫劳於累绩恭惟某官清机昭理奥学潜微鼎鼎弥高发盛名於一世恢恢多裕絶敏悟於千人徊翔郎闱卿寺之清班敷历使节守符之要选刷新不顿斲老逾精輶车骊驾而给转输方观成筭簪笔荷橐而列侍从即展宏图敦礼鉉槩陋儒诗书素业省曹迟次偶类披沙师席滥巾更慚附赘窃欣巨芘之有托私卜羣嘲之可逃庆拚之私敷宣罔既

又贺沈漕启

伏审拜命汉廷观风吴会春闱程试尝叨衡监之明星节鼎来正托云天之庇遭逢若此闔悻惟深恭惟某官朝珥凝珍天球比粹海涵地负浩乎道德之内充月润日光倬彼声华之外发舒翹巍级振羽亨衢凜白简以趋朝奸邪敛迹耀綉衣而持斧草木知威从容陪右府之筹密勿坐郎官之帐汪翔滋久简注弥深眷长江方面之冲正列郡输将之会六师严壁方蚁聚以云屯万口张颐岂鬼输而天雨是用峻宝储之直肃分使节之光第恐不待席温即膺环召给关中之餉馈未究设施陪天上之班行倚登严近敦礼迂踈陋学猥琐微材追时好以取世资偶叨科级去民亩而就吏禄遂困尘埃自惟疏逖之踪尝被品题之重与韩弟子之列已夙慰於平生依苏刺史之天幸今承於巨芘

又贺浙漕陈宗丞启

恭审持节观风影纓入覲久不见贾想闻天上之咨嗟吾能用萧坐使关中之贍给某官行全忠恕性迪诚明文邃乎经笑诸生之尘腐学醇乎道閱理趣之精微斂所养足以涵道真发其才见于应时用顷者淮壖之政略施材刃之余宇定而天自全监明则尘不止故能疏观利病静閱贤愚吏欺洞见於秋毫民隐详知於纖细三月报齐侯之政已闻课最之优二星惊蜀吏之占果叶使华之遣历考此邦之近事间被清朝之异恩犹须迟之岁月之间详试以观其效然後录其循良之绩拔用以旌其功未有坐席始温赐环俄至朝握符而飞皂盖暮揽轡以紆

綉衣宠光之隆敏捷如此若时浙水视昔畿封天日所临人材易见迁之近庶其可以行观而
言察任所难抑亦待其望重而资深伫筹心计之精即在禁严之地某顷叨末掾尝被厚知贺
厦诚深窃自同燕雀之喜登仙路远恨不为驺仆之随

卷十一

钦定四库全书

宫教集卷十一 宋 崔敦礼 撰后十三首

代马守到任通张漕后

寝燕凝香自昔享名藩之乐室如悬磬厥今同凋郡之风师乏见粮吏无继廩财既穷於竭泽
费何补於漏卮适兹困弊之承喜有帡幪之托恭惟某官赋材精敏负器疏通鸣玉登朝早着
月卿之望褰帷行部更杨星使之威积誉处以弥休辑劳能之甚卓伫颁金节召置玉除某受
察云初辱知有素补罅漏敢辞五技之穷涵垢匿瑕正倚二天之覆

代人贺留守张舍人后

承闻大号显拜殊恩凤阁跻荣备极宠优之异鹿坡赞画更当方面之冲朝野耸闻搢绅交庆
恭惟某官元精上瑞间气全材九万搏程自整顿垂天之翼八千鼓篋独铿锵掷地之声徧践
清华游扬中外乃眷艰难之际尤深注倚之专天设金汤任莫隆於居守云屯貔虎谋允赖於
折冲名位至崇兵民攸系爰以西垣之直出分北顾之忧华夏望风江山增气萧何吾能用矣
方蔼着於威声马周暂不见之谅已深於怀想伫前大拜益究远图某困顿无堪迂愚已甚兹
滥居於曹掾愧殊乏於材称欣闻成命之传实倍常情之喜趋庭敛板行参前列之龟染翰舒
牋徒若贺成之燕

代建康倅贺张舍人后

光奉赞书显膺异数宠优事特峻登纶綍之司任大责专兼付兵民之寄除音一出輿颂四驰
恭惟某官负世轶材受天地间气文皆贯道鄙衆作之小成学本辅时卑羣言之近用以一日而
魁多士不数岁而登要津功业着隆搢绅钦叹眷筹幄赞谋之任尤重得人而陪京留钥之司
实难谋帅乃如首德素简上心亟跻禁掖之班全付事权之峻佐裴度而平淮蔡姑暂屈於蕃
宣思马周之识事端谅已深於注想即膺召节入践政途某媿乏长材滥居半刺虽吏责之甫
及实旷败之是忧自惟牢落之踪尝遂参承之幸不图今日获趋下风凤凰之鸣高冈讵敢萌
於攀附燕雀之贺大厦深有赖於帡幪

贺建康留守张舍人后

光膺书赞荣被宸恩眷宠用隆入侍禁严之遽事权增峻出分筦钥之雄除目布传羣情闾悻
恭惟某官一代魁杰四方宗师罗网百氏故其学浩博而闳深根本六经则其文渊源而简蔚
清规辉世奥学丕天衍芳润以诞敷鹳隆名而旁畅大廷发策冠胪传於唾手之间真主结知
驰骏坂若走丸之易敷历方丈蓬莱之清选周旋鸾台凤阁之上游顷分守於辅藩已蔼闻於

嘉績居之以明敏而有撥煩濟劇之術持之以簡素而成減貲徹樂之風吏欺洞見於秋毫民
隱灼知於纖細旋聞報政之最亟被賜環而歸眷江左之輿區有陪京之巨鎮云屯貔虎今
號要冲天設金湯古稱地險方平时无事之際所任猶難况今日多艱之期其責甚重有如鉅
德素穆師言寬上顧忧非公孰可是用峻躋法从全付重權命毕公以保厘姑暫輟秉鈞之任
忆馬周之敏識諒已深側席之思仁膺召节之班即正台衡之拜敦礼迂违陋學猥琐微材追
時好以取世資偶叨科級去民亩而就吏祿方困尘埃不圖幸會之臨將遂趨承之便聲名四
海久愿为之執鞭部属一官茲第勤於賀厦

代丘守和严到任后

萍梗飄流方叹越吟之在楚耕桑交迹窃欣魯柝之聞邾虽拔薤之无从喜伐柯之不远恭
惟某官珠玑咳唾锦绣肝腸文章自以詩鳴問學不为俗絆春风道院想鈴合之多余夜月
澄江宜錦囊之益富豈久紆於銅竹行趣對於金蓮某別日未多向風已劇遥企坐棠之
盛惟勤与梓之恭三年违粉社之期因深怀土九里接洪河之潤幸借余波

代賀詹司諫后

輟自郎省擢登諫垣受知方深有識相庆咸謂朝家以碩大无朋之福乃畀言責於端靖
不撓之臣仁義之學足以推广上心正大之辭足以翼扶公道績乃可底國由是尊恭
惟某官粹比天球珍凝庙璫以清規亮节羽儀多士以懿文奧學根柢六經登步華途
汪翔休問郎官上应列宿方陪錦帳之游天子淨有七人更倚皂囊之獻仁聞籌合
即副岩瞻某久仰余光欣聞成命佩魚符於旬服莫先賀列之趨酌兽尊於天阶
逖想朝儀之盛

代丘守隣郡賀冬后

听嶰律之宮聲一阳来复望魯台之云物万福攸同恭惟某官豈弟宜民中和布政
昔孺今袴惠均洽於阳春佩犢帶牛人自安於化日当景長之履叙宜川至以蒙休
某属領州符阻趨賓閣分光隣壁窃依趙日之暄托訊郵函敢致周正之賀

代前人賀虞丞相加食邑后

鉅典庆成异恩鼎至以功受賞有加命秩之崇与國同休更启山川之錫凡居聞听孰
不欣愉窃以天子必有尊方懋隆於孝治朝廷莫如爵盖允答於元勲直惟命世之
英式贊非常之庆忠嘉深簡光宠用休恭惟某官博大而高明洪深而果毅孟子之
道性善必本乎仁義之归臯陶之为帝謨允迪於圣智之事钦惟舜德克继尧勲
虽巍巍其有成功撝謙不伐常业业日致其孝归美惟勤益增显号之荣永奉慈
顏之喜广爱形四海既昭誉於徽章上贤为三公实相成於盛事爰锡屏藩之
宠用旌弼亮之劳福祿无穷勲庸甚茂某側聞孚号喜极懦衷誦使臣言远之
詩徒傾意氣望相君翹材之館想見光华

代王宪答赵明州启

叨膺宠数滥总祥刑濡轡在行莫奉数行之牒启函下拜遽传两喜之言佩谦柄之勤隆摇心旌而倾邈恭惟某官珍凝庙璫秀毓天潢流华问以被民植丰规而辉国朱轡布政课屡奏於甘泉荡节宣威箭无传於青海勲劳滋茂宠眷弥优姑倚重於维藩即跻荣於夹辅某材资弩缓性稟枵疎兹荐领於使华媿莫承於隆指下大夫之位刺史敢云风采之新长诸侯之居东方庶托帡幪之大

代人谢婺州到任启

将输远服已媿罔功假守近藩又叨申命肃涓时日祇见吏民首宣九重侧席忧勤之怀次道一相同心辅赞之实咸识此意举忘其灾伏念某识不逮中器非致远诗书事业初无游刃之长州县尘劳自觉斲轮之老向玷朝行之选浸登宰掾之班一去修门三更华节当军务飞书之日及饥民待哺之时俱竭忠勤遂觉旷责精神消耗齿髮凋衰已絶念於功名行收心於香火眷言近甸厥有名州古号剧繁建汉都尉之治今隣浩穰命周保厘之贤适更荒歉之余已有流亡之衆田间叹息仓廩穷空虽冒昧以兹来殆徊徨而是虑信不素孚而欲使豪强相劝而倾廩恩非夙着而欲使贫弱有恃而安居方当视印之初益有临渊之畏究殫弩钝凭赖寬仁兹盖伏遇某官宏业熙邦大猷经世凡匹夫之失所愧常軫於纳沟俾多士之适宜要独先於执度岂图委使猥及儒庸某敢不巨细必亲夙宵匪解麤茧之丰有望悦苏难食之民犬马之力已疲终冀均休之请因修谢礼并露恳惊

答总管启

总汉籍之伍符方徯踵门之幸拜荆州之十部遽先移牒之临恭惟某官材力骁雄性资沉鸷传秘编於圯上稟秀色於山西金甲牙旗未究安边之略碧油红旆聊为清部之行敦礼每切向风未谐识面倾盖如故将期幸会之逢投壶雅歌当奉从容之乐

代方守答赵明州贺奉祠启

宗藩在望方欣鲁柝之闻邾真馆投闲自笑越吟之病楚捧尺题而增媿邈森戟以知归恭惟某官璿萼储英珠源毓粹壮矣维城之托屹然磐石之安绦节宣威箭无传於海峤朱轡布政课屡奏於泉宫简注弥优勲劳甚盛昨五色之土聊分青社之封诵九罍之诗即见衮衣之入某漂零末路衰瘁余生卧病淮阳心惭非据养痾瘴浦分合退安辞上彻於天闕恩许休於田里伏枕对画蛇之俎方纳履以言归启函披素鲤之书徒摄衣而下拜

代贺苏给事启

辍自谏垣晋登禁琐夕批敕尾论愈切於囊封朝奏殿中地益亲於伏合眷任之意方笃正大之言可行邮音传闻輿颂交作恭惟某官稟天刚粹负地直方挺挺丰规足廉顽而立懦堂堂

正议每距諛而放淫风烈不坠於家声智略深承於睿眷将罄谋猷之告更跻论駁之司元素
多仁人之言愿闻尔矣叔翰负宰相之器衆窃迟之某久托余光欣闻成命属谨官箴之守莫
陪贺笏之趋朝有直臣必太平敢先士论之庆国多君子未可议益知主势之尊

卷十二

钦定四库全书

宫教集卷十二 宋 崔敦礼 撰杂着十八首

代平江守题御劄獎諭碑

乾道九年秋七月平江阙守诏以臣知军府事九月军须了办蒙恩赐御劄獎諭平江会府经费广赋入不继匱乏之声彻於天听臣既受命出守视事之三日按仓廩察府库郡之所须枵然无遗始乃惶汗失措以不克称塞为惧又念职分守土茧丝丰耗已则是责不敢喋喋以渎君父於是箠策弩钝夙夜究极以振空竭殿司就牧之资水军列屯之馈月费钜万仅逃乏军之诛宸恩优异遽赐褒勅奎画云章震耀心目登拜踧踖以荣以悸窃惟圣天子在上规恢远图显着纲纪昭融勤懈吏道毕振一时人材奋励怱恩以趋功名之会臣之绵薄有此冒宠自揆 惕曷敢以私所赐敬用鑱之琬琰垂耀方来非特虬螭小臣得以承无穷之光亦将传玩四方以为有位者之劝云十月日具位臣拜手稽首谨书

龚养正芥隐铭

子龚子家于吴门有室甚隘促膝不容举头则碍托而隐焉名之曰芥蹙蹙乎较蚁穴之居蚊睫之馆仅为之配人有过而问曰体以养移气由居改孟子所以夸数仞之崇高少陵所以美万间之覆盖今子独不然抑又何故龚子於是抚掌而笑掉头而言曰吾不然吾不然吾岂与子论小大之间哉子其索我於形骸之外吾自视斯室空洞踈阔足以纳太虚而包法界其於川渌流注山岳凝结反而求之无乎不在吾方陶然而居休然而泰罗万象於几案之间揖八荒於轩户之内者也崔子闻之曰芥哉芥哉龚子其得所隐哉安而止俾勿坏

广运潭铭

唐天宝纪元之九年陕郡太守韦坚有请于汉隋运渠起关门抵长安以运山东之赋有诏从之乃絶灞滻并渭而东至永丰仓复与渭合又凿潭於望春楼下以聚舟越二年潭成天子临幸嘉焉锡名广运窃惟唐都长安左崤右蜀沃野千里所出虽多所用滋广故常转漕东南之粟以足关中然历三门底柱之险多风波覆溺之虞杨务廉议凿栈之役而人被其害李齐物建开山之请而舟卒不通裴耀卿议置诸仓而北运亦艰厥费尤甚至是用坚请既复旧渠以兴遗迹又凿巨潭以聚衆艘连檣挟櫓舳舻并进珍奇宝货错杂布列吹笛鸣鼓辐辏楼下都人士女耸观可谓伟已当是时如崔成甫徒知制得宝之曲而未能勒铭章以示不朽回视郑陂之颂新丰之碑得无愧与敢因阙文而为之铭曰唐受天命长安是都国用不给东南是输开元太平费日滋益惟是漕渠议者罔识有臣曰坚是究是图爰得遗迹起汉讫隋乃浚治之以便粮道役无淹辰渠以成告南絶灞滻并渭而东循环周流会于永丰层楼屹然下瞰天府凿潭其旁漕舟所聚是经是营大输东南万艘并下舳舻相衔篙工柁师芒屨短袖连檣挟

櫓鱗次輻輳有尉成甫制歌以扬和者百人鲜服靚粧鸣鼓吹笛来凑楼下都人驾肩欢舞叹讶天子望见喜形于顔爰赐嘉名曰广运潭时惟耀卿是兴北运历时浸久人以为病粤有齐物凿山为门舟不能入水益怒奔猗欵此潭克绍前古我作铭诗勒之岸浒

砚铭

异哉崔子之砚也镂兽以为模环山以为池兽有炳蔚可见之文山有清明秀异之姿斯二者皆象夫君子所为异时藻润邦光粉饰王席则出而用不然且柙而藏之所谓天在山以蓄德含其章而发之以时者也

鼎铭

韩子所载刘师服侯喜弥明聯石鼎诗读之数遍鼎之形模可以尽得依仿模画为龙头豕腹瓜蒂芋萌状颇谓得真以白金令善工就之着铭其上铭曰制虽古意则新玩其器怀其人

御风列子赞

驰骏马而上峻坂马弊则穷驾轻车而适四方车折则止何者彼其所以行假于物也至哉列子御风而行飘然冠裳与风适迎是亦未免于有待也使风定籁息则吾不知所以乘吾闻至人神动天行彼其扶大虚御正气游乎八荒之外则行乎止乎吾安知所以然哉

张魏公像赞

堂堂魏公千古之英名震天下如雷如霆世之以成败论人物者咸曰公开揔戎之府提百万之兵左图右画规模则宏而迄无成谓公之实不称厥声抑不知忠许国而有为躬任重而不惊凛凛乎清中原吞强敌之气历九死而不变其孰知公之忠精呜呼公乎人安知公之然哉盖公之所能者人也於时则有所不能此余所以览遗像而抚膺乾道二年重午後一日

仓耗解

崔子朝出游市寂然若将暮贾匱农困闭而不张钱井金沟谨其阖藏收列肆於九衢刀布滯乎千商至於白藏之府红腐之仓寔帑积滯琛币充梁亦且籤筹寝乎会计关石罢乎低昂怪而问焉有客言於余曰是为春孟望之後一日其名为仓耗财赋出纳必有耗竭人所共畏焉崔子曰信然欵客曰是日也着之令甲以为可戒子何疑之有且时之在天有凶而有吉人之於事有避而有就反支为封章之忌甲穷为用武之凶循火焚於阳和之後戒作室於恶月之中夏则戢土工之役春则禁斩伐之施毋留狱於秋月止发盖於冬时人之所畏安得不畏之况夫仓耗之名有自来矣余非陰阳家流盖尝考之传记春孟之月日月会于娵訾其宿为危室壁奎之分其象为天仓储粟之所今兹既望则月之满者向乎亏月之盈者向乎虚司出纳者忌夫虚且亏也故於是戒之崔子曰是可畏也矣虽然子所谓耗者将天夺而鬼缩之与抑

水毀而火铄之与抑雷霆击而取风云卷而去与胡为乎谨关钥固扃鐏兢兢乎独於是日也夫所谓耗无日无之人之由此常不自知曷於是日而独畏为请为子言夫耗之本男不耕耘游手而嬉妇不布帛组丽是为荒南畝而弗勤抚机轴而居奇丰年有啼饥之叹大寒兴索裘之悲则未作之民耗之矣侈奢隆富猗陶埒名公盜山海货殖私庭錙藏钜万利不周施田连阡陌贫不置锥则兼并之民耗之矣庶人之室侈拟公侯琳宫梵宇帝居同侔倡优僭乎后饰土木被乎文绣错金翠与珠玉络绮锦而编绶则习俗之侈耗之矣疲羸之夫懦瘠之民被甲荷戈伛偻不胜混迹剽猛羣驱连行待哺张颐竭廩空困则无用之兵耗之矣事不省官羊牧交并官不择人牛骥同鸣骈倚叠足排厠鳞征无事而食塞局填局饕窃饫廩自为身荣则不急之官耗之矣视民之利欲渔而获视公之财欲欺而得谓自营为有功以阜国为无益谓厚己为得计以利民为失策起重斂於无名窳簿书於昏惑恣渔蠹与鼠窃涸利源以竭泽肆奸賂於苞苴空帑藏以贸易则贪鄙之利耗之矣吁山林之盛不足供无穷之焚江河之广何以实有漏之卮一线之溜有穿石之患单极之细有断干之期苟六耗之不去将吾财之弗遗夫世之所以为耗者若是而客乃因日月之交会察弦望之盈亏吝出纳於是日严警戒而畏之是所谓蔽於天而不知人不揣其本而惟末之齐者也

平江劝农文

国家务农重穀屡下明诏戒勅四方毋伤民事及春和时又遣刺史亲行阡陌劝种艺于农民尔农民其听刺史言古之时民年二十即受田一夫而百亩春将出耕於野里胥平旦坐於右塾邻长坐於左塾民毕出然後归是以地无旷土邑无敖民衣食足仓廩实而民无饥寒流离之患吴门土沃而泉甘赋入之上于大司农者素甲於江淞岁大熟扬珠捣玉充牣盈溢年来习尚侈靡未作者胜雕文刻镂以相夸耀岁一不登民有饥色扶携转徙累累然於道路非从事焉者寡食其力者不至耶刺史甚媿焉今既节其调度时其力役皂衣白旌之隶不得扰於田野尔农民其各安业深尔耕易尔耨疾尔获毋或失时及秋百室既盈妇子既宁刺史将劳农休息飨朋尊烹羔羊与尔共乐岂不休哉

谤规

人知谤之可忧我以为喜之尤人知谤之可畏我以为爱之至昔者子路乐闻有过道入堂奥德盛名播郑有乡校谤议沸腾侨也不毁其政以成诽木谏鼓圣则设之道路之谤圣则纳之而今之人云胡不思闻誉而悦闻谤而怒过则不知为祸之助淤泥生莲粪壤成芝扁扁巧言得道之资谤者为忠誉者为谀谤之为诚誉之为欺我欲闻谤而未得之敢作斯言以为谤规

题韩子苍帖

东坡每得士则喜语人曰所向无一遂独於文人胜士多获所欲岂造物者专以此物见厚耶余谓陵阳之得黄君其庶几矣

跋蔡确帖

忠怀公墨帖及送将归赋其死生祸福之说读之使人叹息公初贬新州晁美叔谓人曰以言语罪人今日长此风他日虽悔无及呜呼美叔深智远虑所存者大矣使信其说则后来之祸岂遂至於不可救哉

留穷文

子云之逐贫退之之送穷辞各伟丽余反之作留穷屡空先生正月晦日揖穷鬼与之坐而告之曰子高阳之裔颡帝之支衣必缕裂食必用糜生号穷鬼没为穷神死以是日人谓送贫吾与子游於兹有时矣其相得如胶漆之固其相与如鱼水之情故不敢追逐流俗结柳车缚草船载糗与粳系牛引帆以送子行子能舍我而他之乎言未既欻然若有笑于列者曰先生欺予哉夫安贫乐道虽士之常贫而无怨亦人之难人有兰宫秘宇云楣虹梁棼橑布翼栋桴高骧蒂倒茄於藻井饰华榱与璧璫此宫室之丽人所共安也而先生以余之故独得夫瓮牖而蓬窻六珍殊品四膳异肴穷海之错极陆之毛尹公饔鼎庖子挥刀列方丈以华错陈员案而星罗此膏粱之味人所同愿也而先生以余之故独得夫藜藿而簞瓢翡翠火齐流耀含英悬黎垂棘夜光在焉硬碱彩致琳琅青荧珊瑚玉树周阿而生此衆宝之奇人所娱心而侈目也而先生以余之故常捆载垂橐曾不得一金之为资固宜絶我弃我屏之远方门神户灵叱为不祥逐故就新招迎富康而方且眷眷留我而不忘敢问所以受知於先生者何如也先生曰吁子来前子之侑朋非三非四在十除五满七除二顺厥天常立为名字凡所以日训诲於前使吾佩圣人之道而不为流俗之归者皆子之志也且夫刻剥侵削肥己瘠人渔民之财以资厥身此可以富矣子则曰奈何伤吾之仁其名曰仁穷禄可苟求位可力致见德不思惟利是嗜此可以富矣子则曰奈何伤吾之义其名曰义穷觊觎贪饕进进不止矫矫亢亢罔顾廉耻此可以富矣子则曰奈何伤吾之礼其名曰礼穷笼以术数周以心计揣摩低昂而罔市利此可以富矣子则曰奈何伤吾之智其名曰智穷为奸为欺为鄙为吝乖诞弗恤货殖是徇此可以富矣子则曰奈何伤吾之信也其名曰信穷凡此五穷为吾五友厄穷相随贫贱相守教之诲之使我不苟吾其在下得此五友磨砢训励以饬厥躬吾其在上得此五友杰卓清特以奋厥功使千百世之下凜凜乎仰吾之清风所谓富贵不能移其志势利不能动其衷者也若夫慕外物之谓乐谓贫贱为可悲斥吾五友而去之兹余之所不忍为己而五穷相顾失笑曰先生知我矣愿与为友无相弃

代祭陈运使文

惟公德粹而夷行和而恭魁然重厚长者之风问学之源则有所从了翁之门默堂之宗早跻朝行厥问显融璧水是师金闺是通命登宰寮纪纲弥缝命掌掖垣卓然词雄金曰宜哉金螯之宫公谓不然予惟外庸其车皇皇于江之东尚期还归克畅厥功云何天夺夜舟俄空念兹同寅周旋从容十日不见奄然长终顾视陈迹挥涕沾胷歌此奠诗以告我衷

祭陈运使文

惟公奥学本於家传鉅材见於时用外台将指方持金节之华游水兴嗟遽赴玉楼之召咽悲

筵於晓日拂归旒於秋风酌以清樽敬致灵輶之奠潸然哀涕为同行路之伤

代祭林枢密文

惟公醇明硕大端介直方於仁则柔於义则刚其柔维何政安且平分麾乘轺父母其称其刚维何不畏强御洪枢宥府委焉如履公之退休凛乎高风优游乐康八十而终念尝相从闽海之涯绸缪话言有伟其辞云何一别遂隔生死寓哀往奠呜呼亡矣

祭梁宪恭人文

端良之德令淑之姿克昌高门妇道有辉富贵康艾百年其期奄斯沦没闻者嗟咨清醑薄奠其歆之

福建提举钱公侯墓志

淳熙五年夏五月朝请郎提举福建常平茶事钱公以疾卒于家越明年冬公弟秘阁修撰福建路转运副使佃以书来曰先兄葬有日矣嫂氏图所以托不朽者聚族党而谋之咸以子宜诸孤不敢违杖而走敢请某捧书泣曰某幸托公门辱平昔之爱厚今当铭公墓虽哀甚文不能绪亦何敢不力顾念铭所以信後世者以其公尔今取诸姻亲之私得无以某故反鬱公德美亡以畀後人以告修撰修撰反命曰事问可传不可传言问可信不可信何疑亲为且前辈钜公为此可考也某矍然不敢当益谢不获则序而铭之公讳侯字廷硕一字惟犬其先吴越王疏属有赐田居常熟之李墓者故世为平江常熟人曾祖仁贵不仕祖衍累赠右朝议大夫父观复尝为尚书户部员外郎累赠通奉大夫公自少颖异读书不求涉猎务极源底户部公既及全盛时从诸老游窥其堂奥於易学犹深公既尽闻余论又担簦负篋追四方名儒讲道理问经义尝受春秋於师古先生遂尽通其旨盖公之学非利禄计者也甫弱冠从乡进士举考官徐良能见其文不凡有本源意必老儒曾多识前辈遂以为选首启封乃公大惊异之公自是声发騑騑游上庠率占前等厥称譁然绍兴二十一年中乙科授迪功郎调绍兴府山陰尉未赴丁户部忧未终丧丁太夫人忧公率其昆弟执哀几毁免丧暮年始求仕授泰州州学教授自一命閱十余年而仅得禄同时流辈悉清显矣公貌夷气粹益和且平泰兵後庠序不治然士子闻公名乐公之来相与接踵来归充溢于门公发明经义贬异植正学者往往优游厌饫得通其意会时议省两淮冗员教官在省中士子羣诣请留守上其事获请泰讲席赖公独不废乾道二年任满以荐格转从政郎召除太学正公从容学省敛以静晦人莫窥其涯际五年考满以训导有劳改宣教郎六年除宗正寺主簿以书赏转奉议郎七年迁太府寺丞未几兼仓部郎中始人皆以公儒者不嫻於吏及司出纳掌储峙简明精密咸就条理方知公为有用之才也是年转承议郎八年迁宗正寺丞以丐外得请知袁州九年转朝奉郎未赴郡淳熙二年以秘书丞起于家公有庠序名又徊翔中都衆望久属馆阁任人物者屡以言欲上辄止至是士论谓宜既而兼权司封郎官适庆壽肆賚曹事纷委公酬答裕如事以毕举引同列嫌罢权除秘书省著作郎转朝散郎四年除将作少监转朝议郎五年以疾请除提举福建路常平茶事方待对而卒公清方笃诚明白纯粹居无一语妄亦不能曲密处已接物气仁色温

至论古今辨是非议论奋发扶正疾邪有凜然不可犯之色与人交遇所合辄倾倒见肺肝至非其与一壁絕外之其学师友渊源於经术必究其微言大法其文简深安重专慕柳子厚之风平生无他嗜好於世事虽服食亦不问自旦至暮悉沉冥於文史藏书数千卷朱墨精谨皆手自校夜漏尽三十刻犹青灯荧然闻诵书声已而援琴抚曲家人知其将寝虽至老亦然居家抚昆弟怡怡侃侃无一毫间言仕中都不事趋竞当路仅修常礼未尝前交一谈达官以故尝一诣之客衆不得道歛密终其去不再往是以回旋委蛇卒不大振然而其自视仰无愧俯无忤孔子所谓言忠信行笃敬虽蛮貊之邦可行者至其终无一语及家事谈笑不乱安坐而逝自非践履实地合於诚明之学詎能然欤平生所着葺其遗藁得文集五卷诸经讲解十卷易说三卷藏于家公娶同郡马氏封安人三子曰怀忠曰言忠曰作忠其伯仲尝以国学荐试南宫皆力学能文有志持门户者二女长适某次适迪功郎临安县尉陈绅始公怀宜春太守章还家上冢指其东麓曰他日必葬我于此毋令远吾亲也诸孤从其志以淳熙六年十二月七日归公县虞山户部茔之侧其铭曰赋之厚矣而易艰其施仕之亨矣而易戾其宜学不陪细旃之论文不登清庙之诗与随而夷宁介而跻衆趋我违迄止于斯呜呼刻铭幽宫于以昭之